

Ebreusi Ebreusi norĩ ma, rob'ui'éré Ībaihâ wasu'uzé

Ā Ībaihâ na rob'ui'éré hã zudezu norĩ ma hã, Zezusihi zazei'wa norĩ ma hã. Ebreusi hã zudezu norĩ waptêrêzé hãiba amo. Ā Ībaihâ na rob'ui'éré'wa hã ni'wa hã te te waihu'u õ di.

Zudezu norĩ hã Zezusihi zazei'wa norĩ hã ma tô te te 're robzépata za'êtê za'ra, ĩsiré zudezu norĩ hã te te siwi 're wê'õ za'ra mono wa, 'Re ĩhâimana u'âsi mono nhimiroti 'rata na rob'ui'éré hã te te oto 're 'madâ'â za'ra mono õ newa. Taha wa, ma tô Ebreusi na rob'ui'éré'wa hã ĩsazei'wa norĩ âma tihâtâ'â za'ra, zudezu norĩ nhimizaze 'rata zéb u apâ sipizari za'ra õ'umnhasite. Ma tô duré dama waihu'u za'ra, Zezusi hã 'Re ĩhâimana u'âsi mono 'ra uptabi na hã. Ta hã hãiwa âma romhuri'wa norĩ ma, pire uptabi di, ti'ai âma uburé 'Re ĩhâimana u'âsi mono ma romhuri'wa norĩ ma zama, Mozésihi ma, duré Zuzuwéhé ma.

Ma tô duré dama waihu'u za'ra, âne: Zezusi hã dazada ĩsisõmrizé hã danhipai u wê uptabi di, 'Re ĩhâimana u'âsi mono ma, danhimizama hã dasi'udâna da te tãma 're ĩsõmri za'ra mono na hã.

Capituru 11 âma hã ma tô duré wama sisi nhoré za'ra, ni'wam norĩ hã 'Re ĩhâimana u'âsi mono si te te sina 're ĩ'umnhasi za'ra mono zém na hã, te te 're robzépata za'ra mono nherẽ.

'Re ĩhâimana u'âsi mono 'ra wasu'u

¹ Duréihã 'Re ĩhâimana u'âsi mono hã ma tô tizadawa wasu'u 'rata 'wa norĩ ma te te 're

rowasu'u, ta norĩ hã te te oto wahi'rata norĩ ma ãma 're rowasu'u za'ra mono da, ĩsadawa nhipai u hã. Ta norĩ ma, ma tô marĩ na misi si te te tãma 're rowasu'u za'ra, ãma ĩpu'u na hã, 'Re ĩhâimana u'âsi mono te te tãma 're ĩwaihu'u za'ra mono zép sidâpâsi.

² Tane nherẽ, ti'ra si ma tô oto pisutu, ĩsadawa nhipai u te te oto wama ãma 're ĩrowasu'u za'ra mono zéb da hã, rob'rãsutuzéb u romhutu na za 're ĩwahâimana za'ra mono norĩ ma. Taha si ma tô Timama zadawa para uburé te te ro'apoto. Taha si ma tô duré pisutu ĩmama hã, niwapsi uburé roptede'wa na 're hâimana mono da oto.

³ Ōhõ si te oto Timama hã ĩwẽ uptabi na te te dama 're wasu'u, rowa'a ĩsa'êtẽ na hã. Taha si te Timama ne 're hâimana, aiwa wa. Tinhimiroti nhiptete na te uburé marĩ hã te te 're a'upari wẽ, 're si'utõrĩ tõ za'ra mono da. Ōhõ si dawasédé hã te te dama 're aparĩ mono da, dazada dâ'â wa, taha pari hâiwa'utu wa, te oto 'Re ĩhâimana u'âsi mono nhimire niwĩ 're sãmra, hâiwa ãma. Danhipai u ĩwaihu'u pese uptabi nhimire niwĩ te oto 're sãmra, ĩsiré te te 're da'ab'madâ'â mono da oto, pire uptabi na.

ZeZusi hã hâiwa ãma romhuri'wa norĩ ma, pire na 're ĩhâimana mono zé wasu'u

⁴ ĩmama hã ma tô ĩsisi hã tãma tisõ, sisi pire da, 'Re ĩhâimana u'âsi mono 'ra na ĩsisi da hã, uburé hâiwa ãma tãma ĩromhuri'wa norĩ nhisi ma, pire uptabi da. Tane ma duré ĩmama hã pisutu, hâiwa ãma romhuri'wa norĩ ma, pire uptabi na 're hâimana mono da oto, ĩ'ra hã.

5 Duréihã 'Re ìhâimana u'âsi mono zadawa wasu'u'wa hã ma tô ãne na ãma rob'ui'ééré, 'Re ìhâimana u'âsi mono mreme na:

“A hã ì'ra te ìme 're aihâimana mo. Taha wa, wa za oto ì'ra na te 're asisi, dama aipire na 're aihâimana mono da oto.”

Ãne duré ìhâiba amo na rob'ui'ééré hã:

“Wa hã Ìmama wa za tâma 're ìhâimana. Taha wa, ìra te za 're hâimana.”

Ãne duréihã 'Re ìhâimana u'âsi mono mreme na rob'ui'ééré hã. Tawamhã e hâiwa ãma tâma ìromhuri'wa norĩ ãma zama, ma tô ãne na hã rowasu'u, 'Re ìhâimana u'âsi mono hã. Mare di. Zezusihi ãma si, ma tô ãne na hã rowasu'u.

6 Ãne ma tô duré ni'wa hã ãma rob'ui'ééré, 'Re ìhâimana u'âsi mono mreme na, ti'ra hã ti'ai u za te te we ìsatõrîzém na, da'ra hã dama 're ìpoto 'rata za'ra mono ne ìpire uptabi na hã:

“Uburé hâiwa ãma ìma romhuri'wa norĩ hã te za ãma tiwata za'ra.”

Ãne ma tô Zezusihi ãma rowasu'u siro, 'Re ìhâimana u'âsi mono hã.

7 Ãne na si ma tô hâiwa ãma romhuri'wa norĩ ãma hã rob'ui'ééré za'ra, ni'wa hã:

“‘Re ìhâimana u'âsi mono hã ma tô hâiwa ãma tâma ìromhuri'wa norĩ hã pisutu za'ra, rowa'u'u ne 're hâimana za'ra mono da, duré unhama ro'o ne 're hâimana za'ra mono da.”

Ãne na si ma tô ìwasu'u za'ra na ni'wa hã rob'ui'ééré.

8 Tazahã, ì'ra si dama pire uptabi na 're ìhâimana mono zém na ma tô rowasu'u 'Re ìhâimana u'âsi mono hã, ãne:

“A hã Ropoto'wa. Da'ãma 're asib'a'uwẽ mono zé hã aiwi 're si'utõrĩ mono õ di za. Te za tô aima 're hâimana u'âsi.

Duré marĩ na 're upai mono ãna, te za 're ĩda'ab'madâ'â u'âsi mo.

⁹ Uburé marĩ ĩwê hã da te 're ĩ'manharĩ za'ra mono si, aima wê uptabi di. Duré uburé marĩ ĩwasédé hã da te 're ĩ'manharĩ za'ra mono si, ma tô da'ãma 're ĩ'a'ruiwapari mo.

Taha wa, wa hã 'Re ĩhâimana u'âsi mono, Asib'apito hã wa tô aipisutu, uburé asiré 're ĩhâimana za'ra mono norĩ nhipai u, aipire na tãma 're aihâimana za'ra mono da, duré ãne zarina ãma 're atoi u'âsi mono da.”

Ãne ma tô 'Re ĩhâimana u'âsi mono hã ti'ra ma roti.

¹⁰ Ãne ma tô duré ti'ra ma tinha, 'Re ĩhâimana u'âsi mono hã:

“A hã uburé Danhib'apito. Duréhã ropoto na'rata hawimhã ma tô ti'a hã ĩ'manha. Asi'uihã na ma tô duré hãwa hã ĩ'manha.

¹¹⁻¹² Tane nherẽ, te za niwamhã ai'utõrĩ zahuré, sahuré ta norĩ hã, da'uza hã dawi 're ĩhãsiwamnarĩ su'u za'ra mono ne. Duré da'uza pano pa hã dawi 're hãsiwamnarĩ za'ra mono wa, rob u da te oto 're sãmra mono da, da te 're ĩhãnhinha za'ra mono ne, te za ta norĩ hã ĩ'uprosi zahuré, ĩtép si 'manharĩ zahuré da, ĩsõwa're're. Da'uza 'rada hã da te oto dasiwi 're wê'õ za'ra mono wa, ĩhãtép si da te ãma 're ĩsaprĩ za'ra mono ne, te za tô ĩtép si ĩ'manharĩ zahuré, ti'a hã, hãwa me.

Tane nherẽ, niwamhã ai'utõrĩ õ di za, a hã. Aiwétési te za 're aihâimana u'âsi mo. Nimahã na hã ãma saprĩ waihu'u õ di za, aihâimanazém na hã. Tô õhõ si, 're aihâimana mono zé hã za.”

Ãne ma tô 'Re ãhâimana u'âsi mono hã ti'ra ma, waihu'u siro.

¹³ Ãne ma tô duré 'Re ãhâimana u'âsi mono hã tãma waihu'u siro:

“Irata te za 're asãmra u'âsi mo ãnhimire niwĩ, dama aipire na ãsiré 're aihâimana u'âsi mono da. Asitob'ru norĩ nhiptetezé hã wa za tiwi uprosi za'ra, wapu na aima 're hâimana za'ra mono da oto, duré aima sib'ware na 're hâimana za'ra mono da oto.”

Tawamhã, e hãiwa ãma tãma ãromhuri'wa norĩ ma, ma tô ãne hã waihu'u za'ra, 'Re ãhâimana u'âsi mono hã. Mare di. Ti'ra ma si, ma tô ãne hã waihu'u siro, ta norĩ ma, pire u'âsi 're hâimana mono wa za, Zezusi hã.

¹⁴ E niha tawamhã, hãiwa ãma romhuri'wa norĩ 're ãhâimana za'ra mono zé hã. Ta norĩ hã ãhãiba'õ, 'Re ãhâimana u'âsi mono ma, romhuri'wa norĩ. Ta norĩ si ma tô 'Re ãhâimana u'âsi mono hã te te 're satõrĩ za'ra ti'ai u, za te te ãsõ'reptu za'ra norĩ hã te te 're pawaptob za'ra mono da, ti'ab ré. Taha na si, ta norĩ nhimromhurizé hã.

2

Danho'reptuzé ãwẽ uptabi wasu'u

¹ Taha wa, Cristuhu wasu'u wẽ hã wa te 're ãwãpari za'ra mono zép si, wa za wa te 're 'madã'ã pese za'ra, wasina 're wãpahã za'ra mono tõ da, tiwi.

² Duréihã 'Re ãhâimana u'âsi mono nhimiroti hã, hãiwa ãma tãma ãromhuri'wa norĩ hã wahi'rata norĩ ma, te te ãwaihu'u za'ra zé hã tõ sena na 're ãhâimana mono na ma tô da te 're waihu'u za'ra. Duré ni'wã norĩ hã õhõ si te te 're 'madã'ã za'ra mono

õ wa, duré ãsarina si 're nomro wẽ mono õ wa, ma tô 'Re ãhâimana u'âsi mono hã ãsarina te te 're hã za'ra.

³ ãne wa, te te 're ãwa'anho'reptui mono zéb zô, ãwẽ uptabi zô, wa te sô 're rob'ruiwapari za'ra mono õ nherẽ, e ãsimihâzé wi, wa za wasi'uihã na 're wawairébé. 'Re ãhâimana u'âsi mono te te 're ãwa'anho'reptui mono zé wasu'u na ma tô Wanhíb'apito hã dama rowasu'u 'rata, si'uihã na. ãmreme wapari'wa norĩ hã ma tô duré ãne na wama ãma rowasu'u za'ra, tô sena danho'reptuzém na wa te ãma 're ãsaze za'ra mono zéb da hã.

⁴ 'Re ãhâimana u'âsi mono zama, ma tô te te 're wa'apawapto, te te 're ãda'anho'reptui mono zé wasu'u hã, tô sena na 're ãhâimana mono na wa te wasina ãma 're waihu'u pese za'ra mono da oto. Tiwaihu'u pese na marĩ ãwẽ hã dama ãmanharĩ waihu'u'õ hã ma tô te te dama 're ab'manharĩ wẽ, ãma 're ãdatob'uzu za'ra mono zé hã, taha zarina tô sena, wa te ãma 're ãwaihu'u pese za'ra mono zéb da hã, te te 're ãda'anho'reptui mono zé wasu'u hã. Ma tô duré Tipẽ'êzani ma pisutu, romhuri hã ãsazei'wai mono bâ te te sima 're ãawẽ mono zéb zarina, te te tãma 're apisutu mono da, ãma 're ãsipawaptob za'ra mono zéb da hã. Taha zarina, wasi'uihã na tô sena, wa te ãma 're waihu'u pese za'ra mono da, ma tô duré te te 're wa'apawapto, 'Re ãhâimana u'âsi mono hã.

Zezu Cristu hã Danho'reptui'wai wasu'u

⁵ Za 're ãdahâimana téb za'ra mono na, wa tô aima ãma rowasu'u pari za'ra wa'wa. E taha wa, te za hãiwa ãma tãma ãromhuri'wa norĩ hã pisutu za'ra 'Re ãhâimana u'âsi mono hã, ta norĩ hã pire na te

te 're da'madâ'â za'ra mono da, za 're ïdahâimana téb za'ra mono âma hã. Mare di. Ta norĩ hã danhib'apito da, te te pisutu za'ra õ di.

⁶ Tazahã duréihã ni'wa hã ma tô ãne na ïbaihã na ãma rob'ui'ére, 'Re ïhâimana u'âsi mono ma, te te ïrowasu'uzém na hã:

“‘Re ïhâimana u'âsi mono, e dahâimana pire na aima 're dahâimana za'ra mono bâ, te da'ãma 're aipo're pu'u u'âsi mo. E niha da, te bété da'ãma 're aiwamri u'âsi mo, a'uwẽ na si 're dahâimana za'ra mono nherẽ.

⁷ Ma tô aré dama ïpisu, hãiwa ãma aima romhuri'wa norĩ zapari, dawapu na 're dahâimana za'ra mono da a'â. Tazahã, ma tô oto dama ïpisu, dapire na oto 're dahâimana za'ra mono da, ïwẽ na si.

⁸ Ma tô duré dama ïpisu oto, uburé marĩ hã niwapsi da te 're 'madâ'â za'ra mono da, dapire na.”

Ãne na ma tô duréihã dawasu'u na rob'ui'ére, ni'wa hã.

'Re ïhâimana u'âsi mono hã ma tô oto dama pisutu, niwapsi uburé marĩ hã da te 're ï'madâ'â za'ra mono zéb da hã, dapire na. Marĩ hã taré 're 'maihâimana mono õ di za, da te 're ï'madâ'â za'ra mono õ na hã. Tane nherẽ, zahadu uburé marĩ hã da te 're 'madâ'â za'ra mono õ di, ti'a 're dahâimana za'ra mono ré hã.

⁹ Zezusi 're ïmorĩzép si wa tô wa te 're waihu'u pese za'ra. Ta hã ma tô 'Re ïhâimana u'âsi mono hã pisutu, ti'ai ãma 're hâimana mono ré hã, hãiwa ãma tâma ïromhuri'wa norĩ ma, wapu na a'â 're hâimana mono da, dasine. Zezusi hã dazada dâ'â da si, ma tô pisutu 'Re ïhâimana u'âsi mono hã, da'ãma 're pẽ'ézé mono wa, da'ãma 're ïsiwãrĩ mono zéb da hã. Ma tô duré pisutu ti'ra hã, pire na dama 're

hâimana u'âsi mono da oto, dazada ïdâ'â zarina, te te ïrobzépata na te te sina tãma uwaimrami wa, Timama ma hã.

¹⁰ 'Re ïhâimana u'âsi mono hã ma tô uburé te te ro'apoto. Taha ma si te uburé marĩ hã tãma 're hâimana. Ta hã tô ïbã, ma ti'ra hã pisutu Zezusi hã, dazada dâ'â wa, te te robzépata da a'â, taha zarina te te 're da'anho'reptui mono da, te te sina uwaimrami da, 'Re ïhâimana u'âsi mono te te tãma ïpisutuzéb zarina. Da'ahã na hãiwa ãma rowē uptabi na ï'rata 're danomro u'âsi mono da, ma tô ãne da hã tãma pisutu, 'Re ïhâimana u'âsi mono hã.

¹¹ Zezusi hã Timama nhib'a'uwē norĩ pisutu'wa, duré ïsib'a'uwē da, Zezusi te te 're ïpisutu za'ra mono norĩ hã misire ïmama za'ra hã tô ôhõ si. Taha wa, Zezusi hã ãma 're sisé mono õ di, ta norĩ hã tisisãnawã na za te te 're ï'anhisi mono da hã, 'Re ïhâimana u'âsi mono hã misire ïmama za'ra wa, simisutu. Te za tô tisisãnawã na te te 're anhisi, Zezusi hã.

¹² Duréihã 'Re ïhâimana u'âsi mono zadawa wasu'u'wa hã ma tô ãne na ãma rob'ui'ééré, Zezusi hã Timama ma, za te te tãma ïrowasu'uzém na hã:

“Ïsisãnawã norĩ ma, wa za te tãma 're aiwasu'u wē za'ra.

Siré 're si'rã'õtõ mono ré, wa za ai'ãma 're ïwata u'âsi, ïsõ'a za'ra.”

¹³ Ma tô duré ni'wa hã ãne na ãma rob'ui'ééré, Zezusihi mreme wasu'u na hã:

“Ïzama wa za te ïsina 're umnhasi pese u'âsi, 'Re ïhâimana u'âsi mono hã.”

Duréihã ãne, Zezusihi mreme wasu'u amo na da te ãma ïrob'ui'éérézê hã, ïsazei'wa norĩ ãma hã:

“Ãhãta wa hã wa oto 're ïhâimana, 'Re ïhâimana u'âsi mono 'ra na oto tãma 're ïhâimana za'ra

mono norĩ siré, õ hã te te ãma 're ã'apisutu
mono norĩ siré.”

Ãne duréihã Zezusihi mreme wasu'u na rob'ui'ére
hã.

¹⁴ 'Re ãhãimana u'ãsi mono 'ra ne, tãma 're
ãhãimana za'ra mono norĩ hã te a'uwẽ hãiba na 're
hãimana za'ra, nhi ré, duré waprui ré. Taha wa,
ma tô Zezusi hã dasiré si'a'uwẽ, a'uwẽ hãiba na
a'ã 're morĩ da. Tidã'ázém na Wa'uburé nhiptede
hã te te tiwi prub da, ma tô a'uwẽ hãiba na podo,
Wa'uburé nhimiromhuri ma, dadã'ázé ma, marĩ
zô dasipibuma 're danhopré tõ mono da oto.

¹⁵ Ni'wam norĩ hã te tô Wa'uburé nhimiromhuri
zarina, pahi u'ãsi 're hãimana za'ra, tidã'ázé ma
hã, ãwada'uri zarina si pawã'ãbã ãna te te dama
're ãromhuri za'ra mono hã tinhib'apito nhimi-
wada'uri na si sina hãtã'ã u'ãsi 're ãhãimana za'ra
mono ne. Ta norĩ hã tidã'ázé ma, pahi ãna oto 're
hãimana za'ra mono da, ma tô sada tidã'ã za'ra,
Zezusi hã.

¹⁶ E hãiwa ãma romhuri'wa norĩ hã te te 're
pawaptob za'ra mono da, ma tô we ti'ai u
mo Zezusi hã, dawazari si'a'uwẽ da. Mare di.
Abra'ãhã nhihudu mono bã te te 're ãpawaptob
za'ra mono da si, ma tô wei mo. Ãne hã wama
waihu'u pese za'ra di oto, wa norĩ hã.

¹⁷ Taha wa, tisisãnawã norĩ me, aiwa uptabi a'ã
're hãimana mono da, ma tô si'a'uwẽ Zezusi hã,
'Re ãhãimana u'ãsi mono ma, da'ãma romhuri'wa
ãpire uptabi ne 're hãimana mono da, sasedoti ãpire
uptabi ne, tãma umnhasi na te te tãma 're romhuri
mono da, da'ãma pẽ'ézé uptabi sina. Taha da, ma
tô si'a'uwẽ tô, taha zarina dawasédé hã te te oto
dama 're apari mono da. Ta hã dasiré si'a'uwẽ õ

'wa'âhã, ãne hã te te aré sina uwaimrami waihu'u õ di, 'Re ãhãimana u'âsi mono ma hã.

¹⁸ Zezusi hã ma tô robzépata za'êtẽ tô, ti'ab ré. Duré Wa'uburé hã ma tô aré pibu, tiwasédé hã te te 'manharĩ da. Tane nherẽ, te te ãwaparĩ õ zarina, tiwasédé hã te te 'manharĩ õ di. Taha wa, Wa'uburé hã te te oto 're wapibu za'ra mono wamhã, tô õ hã te za te te 're wa'apawapto, ãsine wawasédé hã wa te 're 'manharĩ za'ra mono ãna, wanhiptete sina õhõ ãma si 're wanomro mono da, Zezusihi ãma si.

3

Mozésihi wasu'u, Cristuhu wasu'u me

¹ ãsisãnawã norĩ, a norĩ wa'aba zama ma tô 'Re ãhãimana u'âsi mono hã aipisutu za'ra wa'wa, ãsib'a'uwẽ si oto 're anomro aba mono da, hãiwa ãma ã'rata 're aihãimana u'âsi za'ra wa'aba mono da. Taha wa, te za Zezusihi ãma si 're ãrosa'rata u'âsi za'ra wa'aba mo, 'Re ãhãimana u'âsi mono hã ti'ai u, we te te ãsatõrĩ na, duré dama ãsadawa wasu'u'wa na. Ta hã sasedoti ãpire uptabi na te wa'ãma te te 're romhuri u'âsi, ãwasu'uwẽ na wa te 're ãsaze za'ra mono zém na te te 're wa'apawapto mono da.

² Ta hã ma tô 'Re ãhãimana u'âsi mono ma, umnhasi sina te te tãma 're romhuri wẽ u'âsi, te te tãma 're ã'apisutu mono zéb zarina si. Tane aiwa, duréihã Mozési hã ma tô 'Re ãhãimana u'âsi mono nhĩb'a'uwẽ norĩ ma, umnhasi sina te te tãma 're romhuri wẽ u'âsi za'ra.

³ Ni'wa hã simiromhuri wẽ na te te sima 'ri wamhã, te za ãma tatob'uzu za'ra ni, ãsimiromhuri wẽ na hã. E tawamhã 'ri na si te za ãma tatob'uzu za'ra ni. Mare di. Taha nhĩpai u, te za 'ri 'manharĩ'wai ãma zama tatob'uzu za'ra ni. Tane duré,

Mozési hã dama pire na 're hâimana mono nherẽ, taha hâimanazém nhipai u hã, Zezusihi si dama pire uptabi di.

⁴ Ti'ai âma uburé 'ri hã danhib'rata na rob'manharĩ hã si'uihã na 're si'manharĩ za'ra mono õ di. Taha wa, te 'ri'wa norĩ hã 'ri nhipai u, pire na 're hâimana za'ra. Tane nherẽ, 'Re ãhâimana u'âsi mono si ma tô uburé marĩ hã te te 're ab'manharĩ. Taha wa, te uburé marĩ nhipai u, pire uptabi na 're hâimana u'âsi ta hã siwaprosi.

⁵ Mozési hã ma tô 'Re ãhâimana u'âsi mono ma, umnhasi sina te te tãma 're romhuri wẽ u'âsi, ãsib'a'uwẽ te te tãma 're ãpawaptob za'ra mono zém na hã. Marĩ na 'Re ãhâimana u'âsi mono hã za ti'ab ré te te dama 're ã'arowaihu'u mono zém na, ma tô ãsib'a'uwẽ ma te te 're rowaihu'u sirõmo za'ra, Mozési hã. 'Re ãhâimana u'âsi mono ma, romhuri'wa na si, te ta hã 're hâimana.

⁶ Tane nherẽ, te Cristuhu si tãma umnhasi na uburé ãsib'a'uwẽ norĩ hã te te tãma 're 'madã'ã pese za'ra, pire uptabi na, 'Re ãhâimana u'âsi mono 'ra hã. Wa norĩ hã Cristuhu ãma si 're wanomro mono wa, da te wama 're rob'manharĩ wasété za'ra mono nherẽ, wapahi ãna wanhiptete sina ãma 're wanomro mono wamhã, wa za tô ãsib'a'uwẽ na tãma 're wahâimana u'âsi za'ra. 'Re ãhâimana u'âsi mono hã ãwẽ si, za te te wama ãpisutu za'ra zéb zô, wama umnhasi sina sô 're ãwanhimipari u'âsi za'ra mono zéb zarina, tiwi 're wasipizari za'ra mono õ wamhã, tawapsi wa za tô ãsib'a'uwẽ na tãma 're wahâimana u'âsi za'ra.

'Re ãhâimana u'âsi mono nhib'a'uwẽ norĩ 're ãwa'utu za'ra mono zé wasu'u

⁷⁻⁸ Duréihã ni'wa hã ma tô 'Re ãhâimana u'âsi mono pê'ézani zadawa para, ãne na ãma rob'ui'ére:

“Ã bātâ na, 'Re ãhâimana u'âsi mono mreme hã wapari za'ra wa'aba wamhã, aipo're si'âri 're aihâimana za'ra wa'aba mono õ di za, ai'rã tete aba na. Duréhã aih'i'rata norĩ wa'wa hã ma tô ãne na hã po're ãna sada tihâimana za'ra, 'Re ãhâimana u'âsi mono da. Ta norĩ hã a'ubuni wi 're nomro mono ré, nimahã bātâ na ma tô tiwasédé hã 'manharĩ za'ra, 'Re ãhâimana u'âsi mono hã te te sina pibu za'ra da, niha te te tãma rob'manharĩ za'ra õ zô pé, ãma ãwa'a su'u za'ra õ na hã.”

Ãne ma tô ni'wa hã ãma rob'ui'ére.

⁹ Ãne duré, 'Re ãhâimana u'âsi mono mreme na rob'ui'ére hã:

“Aih'i'rata norĩ hã ma tô siwi ãpibu, ãma ãwa'a su'u za'ra õ zarina, niha te tãma rob'manharĩ za'ra õ zô pé, te te sina ãpibu za'ra da. 40 na ãma wahub za'ra ré, marĩ ãwē na si te 're pawaptob u'âsi za'ra mono nherē, ma tô siwi ãwē'õ, aih'i'rata norĩ wa'wa hã.

¹⁰ Taha wa, wa tô ta norĩ hã oto ãsiwi wē'õ pese za'ra. Taha wa, wa tô ãne ãsima tinha: ‘Ta norĩ hã ãzô si 're sõpré mono õ di oto. ãnhimiroti zarina si 're ãhâimana za'ra mono da hã, te te sima 're wē za'ra mono õ di duré.’ Ãne ta norĩ ãma te ãsima ãrotizé hã.

¹¹ Taha wa, te oto ãsiwi ãwē'õ za'ra zéb zarina, wa tô ãmreme pĩre na ta norĩ ãma tinha, ãne: ‘Tô sena, ta norĩ hã nimahã na hã dame sisisi õ di za, ti'ai wē u hã, ãwa 're ãwa'utu za'ra mono zéb da, te aré tãma ãpisutu za'ra zéb u hã.’ ”

Ãne duréhã 'Re ãhâimana u'âsi mono mreme na rob'ui'ére siro hã.

12 Īsisānawā norī, 'rāwi te za 're asi'madâ'â pese za'ra wa'aba mo, 'Re ĩhâimana u'âsi mono nhimiroti hã asimirosa'rata wasété aba zarina, asiwi 're wē'ō za'ra wa'aba mono wa, tiwi 're aipizari za'ra wa'aba mono tō da, ĩ'rata 're dasi'ubumroi u'âsi mono da, dapisutu'wai wi hã.

13 Awē sidâpâsi te za duré asimiroti na 're asi-pawaptob u'âsi za'ra wa'aba mo, aipē'ē toi u'âsi Cristuhu āma si 're anomro wē wa'aba mono da, asiptete sina. Satanasihi nhimiroti wasédé hã wē newa, aiwasédé hã 're 'manharĩ za'ra wa'aba mono tō da, duré 'Re ĩhâimana u'âsi mono nhimiroti hã asiwi 're wē'ō za'ra wa'aba mono wa, ai'rã tete na tiwi 're aihâimana za'ra wa'aba mono tō da, te za tō 're asipawaptob u'âsi za'ra wa'aba mo, rowē na wasiré 're wahâimana za'ra mono ré, ti'ai āma.

14 Wa norī hã Zezusi, wa te 're ĩsaze na'rata za'ra mono zém hawi, wa tō wa te 're umnhasi za'ētē za'ra. Ta hawim haré, 're ĩwadâ'â za'ra mono zéb u, wa te wasina 're umnhasi u'âsi za'ra mono wamhã, tawapsi wa za Zezusihi siré 're wahâimana u'âsi za'ra, ĩsine dama wapire na wa te 're da'madâ'â u'âsi za'ra mono da.

15 Duréhã ni'wa hã 'Re ĩhâimana u'âsi mono pē'ēzani zadawa para, te te āma ĩrob'ui'ééré na wa za āma aima sahu za'ra wa'wa, āma aipo're si'âri za'ra wa'aba tō da:

“Ā bâtâ na, 'Re ĩhâimana u'âsi mono mreme hã wapari za'ra wa'aba wamhã, aipo're si'âri 're aihâimana za'ra wa'aba mono ò di za, ai'rã tete aba na. Duréhã aih'i'rata norī hã ma tō āne na hã po're āna sada tihâimana za'ra, 'Re ĩhâimana u'âsi mono da hã.”

Ãne duréihã âma rob'ui'ééré, ãbaihã na hã.

16 E 'wam norĩ hã ma tô bété 'Re ãhãimana u'âsi mono mreme hã te te wapari za'ra nherê, siwi wê'õ pese za'ra. E 'wam norĩ hã te bété wasu'u, ãne na âma ãrob'ui'ééré hã. Mozési hã 'Re ãhãimana u'âsi mono waihu'u pese na, Ezitu hawi te te ãsimroi mono norĩ, te wasu'u za'ra. Ma'ãpé âma asipo're pu'u za'ra wa'aba a'â, asi'uihã na.

17 Duré, e 'wam norĩ hã ma tô bété 'Re ãhãimana u'âsi mono hã siwi wê'õ pese za'ra, Mozési hã Ezitu hawi te te dazani za'ra pari, 40 na da'ãma wahub ré, a'ubuni wi 're danomro mono ré hã. Tô õ norĩ hã tiwasédé te te ãmanharĩ za'ra norĩ hã ma tô siwi wê'õ pese za'ra. Tiwasédé hã te te ãmanharĩ za'ra zéb zarina, ma tô a'ubuni wi ai'utõ, ta norĩ hã. Ma'ãpé ta norĩ wasu'u na asipo're pu'u za'ra wa'aba duré, waihu'u za'ra wa'aba da.

18 'Re ãhãimana u'âsi mono hã ma tô ta norĩ âma timreme pire na rowaihu'u sirõmo za'ra, ãne: "Ta norĩ hã nimahã na hã sisisi õ di za, ti'ai wê u hã, ãwa 're ãwa'utu za'ra mono zéb da, te aré tãma ãpisutu za'ra zéb u hã." Ãne ma tô ta norĩ âma waihu'u siro, 'Re ãhãimana u'âsi mono hã, duréihã a'ubuni wi 're nomro mono ré, 'Re ãhãimana u'âsi mono nhimiroti te te siwi ãwê'õ za'ra zéb zarina, po're'õ u'âsi tiwi 're ãhãimana za'ra mono norĩ âma hã.

19 Tawamhã e mari, wa za wa norĩ hã âma waihu'u za'ra ni, ta norĩ wasu'u na hã. Ta norĩ hã 'Re ãhãimana u'âsi mono si te te 're saze za'ra mono õ wa, sisisi õ di, ti'ai wê u hã, ãwa 're wa'utu za'ra mono da, te te aré tãma ãpisutu za'ra zéb u hã. Taha wa, a norĩ wa'wa hã ta norĩ ne aiwasédé hã 're 'manharĩ za'ra wa'aba mono õ di za, 'Re ãhãimana u'âsi mono nhimiroti si 're ãmadã'ã za'ra wa'aba mono õ na hã.

4

¹ Duréihã wahi'rata norĩ ma, te te ropisutu za'ra wamhã, e ta norĩ ma si ma tô rowẽ hã tãma pisutu za'ra, 'Re ãhãmãna u'ãsi mono hã. Mare ãi. Wa norĩ ma zama ma tô wama pisutu za'ra oto, 're ãdawa'utu u'ãsi za'ra mono ne, 're wahãmãna za'ra mono da oto, rowẽ uptabi na. Taha wa, 'rãwi te za 're asi'madã'ã pese za'ra wa'aba mo, 'Re ãhãmãna u'ãsi mono te te wama ãropisutu za'ra zé hã asiwi 're simini za'ra wa'aba mono tã da, duréihã wahi'rata norĩ hã te te ãsimini za'ra ne.

² Ta norĩ hã 'Re ãhãmãna u'ãsi mono nhimiropisutu wẽ hã te te wapari za'ra nherẽ, te te sina uwaimrami za'ra õ ãi, te te ãma saze za'ra õ wa. Tane duré, wa norĩ zama wa tô 'Re ãhãmãna u'ãsi mono wasu'uwẽ hã wa te 're wapari za'ra. Tane aiwa ãsimiropisutu wẽ na wa te 're saze za'ra mono õ wamhã, wa norĩ zama wa te wasina 're uwaimrami za'ra mono õ ãi za, te te wama ãropisutu za'ra zé hã, 're ãdawa'utu u'ãsi za'ra mono ne, 're wahãmãna za'ra mono da hã oto, rowẽ uptabi na hã.

³ 'Re ãhãmãna u'ãsi mono, wa te wasina 're ã'umnhãsi za'ra mono norĩ si, wa za tô wasina wa te 're uwaimrami za'ra, 're ãdawa'utu u'ãsi za'ra mono ne, rowẽ uptabi na oto ãma 're ãwahãmãna u'ãsi za'ra mono zéb da hã, te te wama ãropisutu za'ra zém na hã. 'Re ãhãmãna u'ãsi mono te te sina 're ã'umnhãsi za'ra mono õ norĩ si te te sina 're uwaimrami za'ra mono õ ãi za, rowẽ hã. Duréihã ni'wa hã ma tô ãne na ãma rob'ui'éré, 'Re ãhãmãna u'ãsi mono mreme na, wahi'rata norĩ ãma hã:

“Te ãsiwi ãwẽ'õ za'ra zéb zarina, wa tô ãmreme pire na ta norĩ ãma tinha, ãne: ‘Tã sena, niwamhã dame sisisi õ ãi za, ti'ai wẽ u hã, 're ãdawa'utu

za'ra mono ne, aré ĩwa 're hâimana za'ra mono da, te tãma ĩpisutu za'ra zéb u hã. ”

Ñe duréihã 'Re ĩhâimana u'âsi mono mreme wasu'u na rob'ui'ééré hã.

E tawamhã, 'Re ĩhâimana u'âsi mono hã zahadu te te tãma pisutu za'ra õ wa, te te sina uwaimrami za'ra õ di, wahi'rata norĩ hã. Mare di. Taha wab õ di. Ropoto na'rata hawimhã ma tô uburé marĩ hã te te sima apisutu sirõmo, marĩ hã te te dama ãma 're ĩ'ab'manharĩ mono zéb da hã.

⁴ Duréihã 'Re ĩhâimana u'âsi mono zadawa wasu'u na ma tô ni'wa hã ãne na ãma rob'ui'ééré, te te ro'apoto mono pari, ãma ĩ'awëzém na hã, ãne:

“Re ĩhâimana u'âsi mono hã zahadu 6 na bâdâ hã ãma morĩ ré, ma tô te te ro'apoto. Taha pari, ãma awë wamhã, te oto wa'udu, romhuri ãna.”

⁵ ãne tô õhõ wasu'u hã, duréihã wahi'rata norĩ ãma ni'wa te te ãma ĩrob'ui'éérézê hã, 'Re ĩhâimana u'âsi mono mreme na hã:

“Tô sena niwamhã dame sisisi õ di za, ti'ai wë u hã, 're ĩdawa'utu u'âsi za'ra mono ne, aré ĩwa 're hâimana za'ra mono da, te tãma ĩpisutu za'ra zéb u hã.”

⁶ Duréihã ti'ai wë wa, 're ĩdanomro wë mono zé wasu'u wapari 'rata 'wa norĩ hã, ta norĩ hã 're ĩdawa'utu u'âsi za'ra mono ne, ĩwa 're hâimana za'ra mono da, 'Re ĩhâimana u'âsi mono te te tãma ĩpisutu za'ra zé hã te te sina uwaimrami za'ra õ di, ĩsimiroti hã te te 're 'madâ'â za'ra mono õ wa, ta norĩ hã. E tawamhã õhõ haré ma tô dawĩ sizã 'Re ĩhâimana u'âsi mono hã, 're ĩdawa'utu u'âsi za'ra mono ne, rowë uptabi na 're ĩdanomro u'âsi mono zé hã. Mare di. Si'utõrĩ waihu'u õ di, ta hã. Ni'wam norĩ hã te za tô rowë uptabi na 're ĩdahâimana za'ra

mono zéb u 're sisisi, 'Re ìhâimana u'âsi mono te te tãma ìpisutu za'ra zéb zarina.

⁷ E niha wa za tawamhã ãne na sena na wa te ãma 're waihu'u za'ra. 'Re ìhâimana u'âsi mono hã ma tô bâdâ hã tô sena na pisutu, 're ìdawa'utu u'âsi za'ra mono ne, rowẽ uptabi na 're ìdanomro mono zéb u 're ìdanhisisi mono zéb da hã. Tawamhã, ãne te te pisutu wamhã, “ã bâtâ na” ma tô sisi, 'Re ìhâimana u'âsi mono hã. ãne na ma tô apito Dawi hã dama sadawa wasu'u, duréihã wahi'rata norĩ hã a'ubuni wi 're ìnomro mono zém hawi, ãma wahub ahâ za'ra parip si. ãne apito Dawi te te ãma ìrob'ui'érézém na te aima ãma ìrob'ui'éré pari za'ra wa'aba zé hã, ãne:

“Ã bâtâ na, 'Re ìhâimana u'âsi mono mreme hã wapari za'ra wa'aba wamhã, aipo're si'âri 're aihâimana za'ra wa'aba mono õ di za, ai'rã tete aba na.”

⁸ Duréihã Zuzuwé hã ti'ai wẽ u te te ìdanhimroi mono zé hã, e taha si, 'Re ìhâimana u'âsi mono, 're ìdawa'utu za'ra mono zéb da, te te dama ìpisutuzé hã, te wasu'u. Mare di. Taha si õ di. Taha si 'wa'âhã, 'Re ìhâimana u'âsi mono hã niwamhã te te aré wasu'u zahu õ di ãne hã, 're ìdawa'utu u'âsi za'ra mono ne, rowẽ uptabi na 're ìdanomro mono zé wasu'u hã.

⁹ 'Re ìdawa'utu u'âsi za'ra mono ne, rowẽ uptabi na 're ìdanomro mono zé hã, te tô 'Re ìhâimana u'âsi mono nhib'a'uwẽ norĩ ma 're hâimana u'âsi, õne u'â, duréihã ropoto na'rata hawi bâdâ hã 6 na ãma si'utõrĩ pari, bâdâ misi na romhuri ãna ìwa'utu ne, 'Re ìhâimana u'âsi mono hã.

¹⁰ Ni'wam norĩ hã 're ìdawa'utu u'âsi za'ra mono ne, rowẽ uptabi na 're ìdanomro mono zéb da hã, 'Re ìhâimana u'âsi mono te te dama ìpisutuzém na te

te sina 're ĩ'uwaimrami za'ra mono norĩ hã, 're siwasutu za'ra mono õ di za oto, taha na 'Re ĩhâimana u'âsi mono te te 're ĩ'awẽsãmri mono zéb da hã. 'Re ĩhâimana u'âsi mono hã duréihã te te ro'apoto mono pari, romhuri te te ĩsazâri ne, 're siwasutu zahu za'ra mono õ di za oto, ta norĩ hã apâ.

11 Taha wa, rowẽ uptabi na 're ĩwanomro mono zéb zô si, wa za wasima 're wanhopré u'âsi, âma 're wahâimana u'âsi za'ra mono da. Duréihã Izarazéhé nhihudu norĩ hã a'ubuni wi 're nomro mono ré, 'Re ĩhâimana u'âsi mono nhimiroti te te siwi wẽ'õ pese za'ra wa, ta norĩ hã te te sina uwaimrami za'ra õ di, 're ĩdawa'utu u'âsi za'ra mono zé hã. Ta norĩ ne, wa te wasiwi 're simini tõ za'ra mono da, wa za tô taha zô si wasima 're wanhopré u'âsi, ĩwẽ uptabi zô si.

12 'Re ĩhâimana u'âsi mono zadawa wasu'u hã ĩhâiba ré ne, te tô wama 're hâimana u'âsi za'ra. Siptete uptabi di duré ĩmreme hã, uburé marĩ hã ĩsarina si te te dama âma 're ĩ'ab'manharĩ mono zéb da hã, 'Re ĩhâimana u'âsi mono hã. Sib'ézé 'wa si'uiwa ĩ'wa pese ne, te wama 're hâimana za'ra, ĩsadawa wasu'u hã. Sib'ézé ĩ'wa pese na te za romnhi hã da te 're nhizazari za'ra, ĩhi si da te 're urĩrĩ za'ra mono da. Tane duré, 'Re ĩhâimana u'âsi mono zadawa wasu'u hã wa te 're wapari za'ra mono wanhã, 'râwi wapě'ẽ na wanhimirosa'rada ĩwẽ hã duré ĩwasédé hã wa za wa te âma 're waihu'u za'ra.

13 Uburé marĩ hã 'Re ĩhâimana u'âsi mono wi, da te 're upsibi waihu'u za'ra mono õ di, te te 're ab'madâ'â tõ mono da hã. Ai'uréiwi ne, te uburé marĩ hã tâma 're hâimana, sõ'awi. Taha ma si, wa za nimahã na hã wahâimanazém na tâma wasiwasu'u za'ra ni. Taha wa, wahi'rata norĩ ne, 're wahâimana

za'ra mono õ di za, wa norĩ hã.

ZeZusi hã sasedoti ĩpire uptabi na te te da'ãma 're ĩromhuri mono zé wasu'u

¹⁴ Sasedoti ĩpire uptabi na te tô ni'wa hã te te wa'ãma 're romhuri u'âsi. Ta hã ZeZusi, 'Re ĩhâimana u'âsi mono 'ra. Timama u ma tô mo hãiwu u, 'rãwi te te tiwi 're rowaptêrê u'âsi mono da, wama za'ra. Taha wa, ZeZusi, wa te 're ĩsaze za'ra mono zém na tô sena dama 're ĩwasiwasu'u za'ra mono zéb zarina, wa za tô ta hawim haré wanhiptete sina ãma 're wahâimana u'âsi za'ra.

¹⁵ Tawamhã tô õ hã sasedoti ĩpire uptabi na, te te wa'ãma 're ĩromhuri mono hã, e wahâimana nhib'uware na 're wahâimana za'ra mono nherê, wa'ãma 're siwamri mono õ di za, ta hã. Te za tô wa'ãma 're siwamri u'âsi. E marĩ wa. Ta hã ma tô Wa'uburé hã te te 're pibu aré, tiwasédé hã te te 'manharĩ da, wawasédé hã wa te 're 'manharĩ za'ra mono da, te te 're ĩwa'apibui u'âsi mono ne. Tane nherê, tiwasédé hã te te 'manharĩ õ uptabi di, ZeZusi hã.

¹⁶ Taha wa, wasina 're wahâtâ'â za'ra mono ãna, wa za 'rãwi wapê'ê 're 'Re ĩhâimana u'âsi mono u 're wasihutu, da'ãma 're siwãrĩ mono da, te te 're ĩda'ab'madâ'â u'âsi mono u hã. Wa'uburé te te 're wa'wapé za'ra mono ré, wa'ãma 're siwamri mono da, duré wa'ãma 're siwãrĩ mono da, wa za ãhã ré wapê'ê 're, ĩtême 're wasihutu u'âsi, 'Re ĩhâimana u'âsi mono u hã.

5

¹ Duréihã ma tô ni'wam norĩ hã 'Re ĩhâimana u'âsi mono hã te te 're apisutu, tisiré sasedoti norĩ nhipai u, pire uptabi na te te 're romhuri za'ra mono da, tisiré zudezu norĩ ãma, 'Re ĩhâimana u'âsi

mono ma. Ta norĩ si ma tô 'Re ãhâimana u'âsi mono ma, danhoprubzé hã te te tãma 're sãmri za'ra da'upana, ãma 're ãwata za'ra mono zéb da hã. Danhimizama ma tô duré da'upana te te tãma 're simro, dawasédé hã te te dama ãma 're ã'apari mono zéb da hã.

² Ta norĩ hã sasedoti ãpire uptabi norĩ hã ma tô hãimana nhib'uware na 're hãimana za'ra, ti'ai ãma dasiré 're hãimana za'ra mono wa, aiwa. Taha wa, ni'wam norĩ hã tiwasédé te te 're ã'manharĩ za'ra mono zém na 'rãwi 're ãsiwaihu'u za'ra mono õ norĩ ãma, ma tô sasedoti norĩ hã 're siwamri za'ra, sada 're sahi su'u za'ra mono ãna. E marĩ wa. Ta norĩ hã aiwa tiwasété wi, 're hãimana nhiptete waihu'u za'ra mono õ wa, ma tô tisiré norĩ ãma 're siwamri za'ra sasedoti norĩ hã, aiwa 're hãimana za'ra mono wa.

³ Duré ta norĩ hã da'udãna si, marĩ hã 'Re ãhâimana u'âsi mono ma, te te 're sãmri za'ra mono õ di, dawasédé hã te te dama ãma 're ã'apari mono zéb da hã. Si'udãna zama ma tô marĩ hã te te tãma 're sãmri za'ra sasedoti norĩ hã, dasine tiwasédé hã te te 're 'manharĩ za'ra mono wa.

⁴ E tawamhã ma tô 'rãwi ni'wam norĩ hã 're sipisutu za'ra, sasedoti ãpire uptabi na dama 're ãhâimana za'ra mono da hã. Mare di. Dasi'uihã na 're dasipisutu za'ra mono õ di, dapire da hã. 'Re ãhâimana u'âsi mono nhimipisutu zarina si, ma tô sasedoti ãpire uptabi na hã 're hãimana za'ra. Duréihã Arã hã sasedoti ãpire uptabi na tisiré norĩ ma, 're hãimana mono da, 'Re ãhâimana u'âsi mono te te ãpisutu ne, ma tô ta norĩ hã te te 're apisutu, tô õhõ si dapisutu'wai wa.

⁵ Tane duré, Cristu hã si'uihã na sipisutu õ di, sasedoti ãpire uptabi na dama 're ãhâimana mono

da hã. 'Re ìhâimana u'âsi mono si ma tô pisutu. Duréihã ma tô ni'wa hã ãne na ãma rob'ui'éré, 'Re ìhâimana u'âsi mono te te ìrotizém na hã, ti'ra ma:

“A hã ì'ra te oto 're aihâimana mo. Taha wa, wa za ì'ra na te 're asisi, dama aipire na 're aihâimana mono da oto.”

⁶ ãne duré, 'Re ìhâimana u'âsi mono mreme na ãma ìrob'ui'éré amo hã, Cristuhu ãma hã:

“A hã sasedoti norĩ, dama 're ìhâimana za'ra mono ne, te za dama 're aihâimana u'âsi mo, duréihã Metizédéti hã sasedoti na pire na dama 're ìhâimana mono ne hã.”

ãne duréihã 'Re ìhâimana u'âsi mono mreme na rob'ui'éré hã, Cristuhu ãma hã.

⁷ Zezusi hã ti'ai ãma 're morĩ ré, ma tô wawa sina Timama ma mre, mreme 'rãihã na, za te te ìrobzépatazém na te te pawaptob da. Tawamhã 'Re ìhâimana u'âsi mono, Zezusihi mreme te te wapari wamhã, ma tô sima wẽ tô, te te pawaptob da. Zezusi hã uburé marĩ hã Ìmama te te tãma ìpisutuzéb uwaibaba si, te te 're ab'manharĩ mono da, te te sima 're wẽ u'âsi mono wa, ma tô Ìmama hã sima wẽ, te te pawaptob da. 'Re ìhâimana u'âsi mono hã te te sima wẽ 'wa'áhã, te aré tô tiwaihu'u pese na sõ'reptu, dâ'â tã da.

⁸ Zezusi hã 'Re ìhâimana u'âsi mono 'ra, 're hâimana mono nherẽ, ma tô te te 're robzépata, ti'ai ãma 're morĩ ré hã. Taha zarina ma tô ãne hã si'ãma waihu'u: Ni'wam norĩ hã, 'Re ìhâimana u'âsi mono nhimiroti te te 're 'madâ'â pese za'ra mono da, te te sima 're wẽ za'ra mono wamhã, taha zarina te za tô te te 're robzépata za'ra, ti'ab ré. ãne ma tô Zezusi hã si'ãma waihu'u.

⁹ Tawamhã Zezusi hã ti'ab ré, te te 're robzépata mono nherẽ, Ìmama te te tãma ìwẽzéb zarina si te te 're ab'manharĩ mono wa, ma tã sina uwaimra, uburé Ìsimiroti te te 're Ì'madã'â pese za'ra mono norĩ hã te te 're sõ'reptu za'ra mono da, hãiwa ãma dã'ã ãna 're hãimana u'âsi za'ra mono da.

¹⁰ Duréihã 'Re ìhãimana u'âsi mono, ma tã Zezusi hã pisutu, sasedoti ìpire uptabi na dama 're hãimana mono da, tãma da'ãma romhuri'wa da, duréihã Metizédéti hã sasedoti na pire na dama 're ìhãimana mono ne, uburé ma, 're hãimana mono da.

'Re ìhãimana u'âsi mono nhimiroti mono bã ìpire wasu'u

¹¹ ãne na te duré aima ãma rowasu'u za'ra wa'aba da, wa tã aré ìsima wê. Tane nherẽ, pire di, te aima ãma ìwaihu'u za'ra wa'aba zéb da hã. E marĩ wa. Aima rowasu'u hãtob za'ra wa'aba wa.

¹² A norĩ wa'wa hã Cristu, 're ìsaze na'rata za'ra wa'aba mono zém na ma tã ai'ãma tironomro pese za'ra wa'wa. ãhã wamhã, te aré oto ìsazei'wa norĩ ma, romnhoré'wa da, 're aihãimana za'ra wa'aba mo, 'Re ìhãimana u'âsi mono nhimiroti na rowasu'u'wa da hã, ta norĩ ma. Tane nherẽ, te zahadu a norĩ wa'wa hã ìsazeté'wa ne, 're aihãimana za'ra wa'aba mo. 'Re ìhãimana u'âsi mono nhimiroti hã duréihã da te aima 're ìwasu'u na'rata za'ra wa'aba mono zé hã e aima waihu'u za'ra wa'aba ã bã, te za apã ìwasu'u na ãma aima sahu za'ra wa'aba ni. Ai'uté hã tisai uptabi na 're saihuri waihu'u mono õ wa, te za tinho'u na si 're saihuri. Ìna norĩ hã ìsai uptabi hã te te tãma 're ai waihu'u za'ra mono õ di. Tane, a norĩ wa'aba ma, te za tã 'Re ìhãimana u'âsi mono nhimiroti hã duréihã da te aima 're ìwasu'u na'rata za'ra wa'aba

mono zép si, da te aima 're wasu'u za'ra wa'wa apâ, 'Re ìhâimana u'âsi mono nhimiroti ìpire hã zahadu aima pibui prã za'ra wa'aba wa, 're ìwaihu'u pese za'ra wa'aba mono zéb da hã, asi'uihã na hã.

¹³ Ai'uté norĩ ma, tãma waihu'u õ di, 'Re ìhâimana u'âsi mono ma ìwê hã da te 're ìmanharĩ za'ra mono zéb da hã, duré tãma ìwê'õ hã da te 're ìmanharĩ za'ra mono tõ da hã. Tane te duré a norĩ wa'wa hã zahadu ãne na 're aihâimana za'ra wa'aba mo. Ai'uté ne, te zahadu asimiza'rese'õ u'âsi 're aihâimana za'ra wa'aba mo, aima waihu'u za'ra wa'aba õ wa.

¹⁴ Ìprédum norĩ si te tisai uptabi na hã 're saihuri. Tane duré, 'Re ìhâimana u'âsi mono nhimiroti ìpire hã tãma ìwaihu'u pese za'ra norĩ si te za waihu'u za'ra, 'Re ìhâimana u'âsi mono ma, ìwê si da te 're ìmanharĩ za'ra mono zé hã, duré tãma ìwê'õ hã da te 're ìmanharĩ za'ra mono õ zé hã. Uburé marĩ hã ìwê zõ, duré ìwasété zõ, te te 're ìpibu za'ra mono zéb zarina si, te za te te 're waihu'u pese za'ra, ta norĩ ma si waihu'u pese wa.

6

¹ Taha wa, Cristuhu wasu'uwê na 're saze za'ra wa'aba mono da, duréihã da te aima ãma 're ìrowasu'u na'rata za'ra wa'aba mono zém na si asima ãma 're rosa'rata u'âsi za'ra wa'aba mono õ di za oto. Taha nhipai u, te za 'Re ìhâimana u'âsi mono nhimiroti mono bâ ìpire uptabi hã 're ìwaihu'u pese za'ra wa'aba mo Cristuhu wasu'uwê hã, aihâimana prédub sina ãma 're aihâimana za'ra wa'aba mono da. 'Re ìhâimana u'âsi mono nhimiroti mono bâ, duréihã da te aima ãma 're ìrowasu'u na'rata za'ra wa'aba mono zém na apâ asima ãma 're roti zahu za'ra wa'aba mono õ di za

oto. Taha na rowasu'u mono hã ma tô 're ïwaihu'u pari za'ra wa'aba mo, dapě'ě 're, dadâ'â u'âsi ne dawasédé, da te 're 'manharĩ za'ra mono pari, ta hawi 're ïdasipizari za'ra mono zém na rowasu'u hã, duré 'Re ïhâimana u'âsi mono, da te dasina 're ï'umnhasi za'ra mono zém na rowasu'u hã.

² Duré â dawabzuri wasu'u na hã apâ asima ãma 're roti zahu za'ra wa'aba mono õ di za oto. Ta hã ma tô 're ïwaihu'u pari za'ra wa'aba mo. Rowahutu'wa norĩ hã, tinhib'rada hã da'rã nhisiwi te te 're ïsa'ra mono zarina, romhuri da, te te 're ïdapisutu za'ra mono wasu'u zama ma tô 're ïwaihu'u pari za'ra wa'aba mo, Cristuhu wasu'uwě na 're saze za'ra wa'aba mono da, da te aima ãma 're ïrowasu'u na'rata za'ra wa'aba mono zé hã. Tâibâ duré, dahâiwa'utuzé wasu'u hã, duré 'Re ïhâimana u'âsi mono za te te dama 're ï'apisutu mono zéb zarina, ïsimirob'manharĩ pipa ãma za 're ïdahâimana u'âsi za'ra mono zé wasu'u hã. ã norĩ wasu'u mono hã ma tô 're ïwaihu'u pari za'ra wa'aba mo.

³ Taha wa, ã norĩ wasu'u nhipai u, wa za oto roti ïpire uptabi hã wa te 're waihu'u za'ra, wahâimana prédum na oto ãma 're wahâimana za'ra mono da, 'Re ïhâimana u'âsi mono te te wama 're ï'apisutu mono zéb zarina si.

⁴⁻⁶ Áté ni'wam norĩ hã te za 'Re ïhâimana u'âsi mono nhimiroti hã sena na te te 're waihu'u za'ra, taha zarina 'Re ïhâimana u'âsi mono nñimirowa'a na si 're hâimana za'ra mono da oto. Áté dasa ïse hã da te 're ïtê'ě za'ra mono ne, te za 'Re ïhâimana u'âsi mono nhoprubzé hã tē'ě za'ra, ta norĩ hã. Áté 'Re ïhâimana u'âsi mono pē'ězani ré, te za duré ta norĩ hã dame 're hâimana za'ra. 'Re ïhâimana u'âsi mono mreme hã te za duré áté waihu'u za'ra, ïsei

uptabi hã, si'uihã na. Áté te za duré 'Re ìhâimana u'âsi mono pẽ'ẽzani nhimipawaptobzé hã ìsiré 're hâimana u'âsi za'ra, te te 're waihu'u pese za'ra mono wa, ãma 're ìhâimana wẽ za'ra mono da hã. Áté ta norĩ hã Cristuhu nhimipawaptobzé hã te te waihu'u pari za'ra nherẽ, te za oto tiwi 're sipizari za'ra, apâ. E tawamhã apâ da te 're pizari waihu'u pese za'ra mono di za, 'Re ìhâimana u'âsi mono u hã. Mare di. 'Re ìhâimana u'âsi mono 'ra, wedepo'o nhonhi'rãmi na dá'â da, da te dasiwi sasõmri wa, da te dasiwi ìwẽ'õ pese za'ra ne, te za duré ta norĩ hã siwi wẽ'õ pese za'ra oto, Cristu hã. Taha zarina, te za duré Cristuhu ãma da te 're wasété za'ra, Cristuhu wi apâ 're sipizari za'ra mono wa, ta norĩ hã.

⁷ ãne wa za oto ti'ai wasu'u na aima ãma romnhimiré'é za'ra wa'wa. Ti'a hã wẽ wamhã, tâ hã 're ta'a mono sidâpâsi, te za ãma 're ro'wanhipré wẽ za'ra, ìtede'wa norĩ ma. 'Re ti'ai 'ré su'u mono õ wa, te za ãma 're ro'wanhipré wẽ za'ra, ti'ai wẽ na hã. ãne wa, te za 'Re ìhâimana u'âsi mono hã ìwẽ hã tâma pisutu, ti'ai wẽ ma hã.

⁸ Tazahã, ro'wa si duré wab'ru zama, ãma 're poto za'ra mono wamhã, marĩ dai õ di, ti'a hã. Taha wa, áté te za 'Re ìhâimana u'âsi mono hã siwi wẽ'õ pese. ãne wamhã, unhama ro'o na te za uprosi, ti'a hã. ãne 're ìdahâimana za'ra mono zém na romnhimiré hã.

⁹ ìsisãnawã norĩ, ìma asawi pese za'ra wa'aba norĩ hã, ãne na te aima ãma romnhimiré'é za'ra wa'aba nherẽ, ai'ãma 're ìhâtâ'â za'ra wa'aba mono õ di. Sena na wa tô oto ãma aiwaihu'u za'ra wa'wa, marĩ ìwẽ si 're ì'manharĩ za'ra wa'aba

mono zém na hã, 'Re ìhâimana u'âsi mono te te 're ì'asô'reptu za'ra wa'aba mono zéb zarina.

¹⁰ 'Re ìhâimana u'âsi mono hã ì'uwaibaba si te uburé marĩ hã te te dama 're ab'manharĩ, te te dawĩ ãma 're a'upai mono ãna. Taha wa, tãma 're ìromhuri za'ra wa'aba mono zém na nimahã na hã ãma po're si'âri õ di za. Ìsib'a'uwẽ norĩ hã tãma 're ìpawaptob za'ra wa'aba mono zém na hã, duré tãma 're ìsawi pese za'ra wa'aba mono zém na hã, ãma po're si'âri waihu'u õ di za. Te za tô ãma 're sipo're pu'u u'âsi, ta norĩ ãma hã.

¹¹ Wa tô ìsima aiwẽ za'ra wa'wa, tô õhõ na si 'Re ìhâimana u'âsi mono ma, 're aihâimana u'âsi za'ra wa'aba mono da, rob'rãsutu u, ìwẽ uptabi zô 're asimipari za'ra wa'aba mono zé hã asina 're uwaimrami za'ra wa'aba mono da.

¹² Aiwa'a ãna õhõ ãma si 're aihâimana za'ra wa'aba mono da, wa tô te ìsima 're aiwẽ za'ra wa'wa. Ni'wam norĩ hã siptete sina, Cristu te te sina 're ì'umnhasi za'ra mono norĩ hã te za 'Re ìhâimana u'âsi mono hã ìwẽ uptabi hã tãma sômri za'ra, te te tãma ìropisutu za'ra zéb uwaibaba. Ta norĩ, 're ìhâimana za'ra mono ne, Cristu hã asina 're umnhasi za'ra wa'aba mono da, wa tô te ìsima 're aiwẽ za'ra wa'wa.

'Re ìhâimana u'âsi mono hã sena na te te dama ìropisutuzé wasu'u

¹³ Duréihã 'Re ìhâimana u'âsi mono hã Abra'ãhã ma, te te ropisutu wamhã, tinhisi na ma tô tãma ropisutu, ni'wa hã 'Re ìhâimana u'âsi mono ma ìsisi pire hã tãma 're hâimana mono õ wa, ìsisi na te te tãma ìropisutu da hã.

¹⁴ Æne ma tô Abra'ãhã ma ropisutu: "Ìwẽ uptabi hã wa za te aima 're anhomri u'âsi. Asihudu

sidâpâsi, ahâ uptabi na te za 're hâimana za'ra.” Āne ma tô 'Re ĩhâimana u'âsi mono hã si'uihã na tãma ropisutu, Abra'ãhã ma hã.

¹⁵ Tawamhã Abra'ã hã wahub ahâ na te sô 're simipari, simi'ẽ na. Taha wa, 'Re ĩhâimana u'âsi mono, ma tô ãma tãma uwaimra oto, te te tãma ĩropisutuzém na hã.

¹⁶ Tane nherẽ, wa norĩ hã marĩ pire na wa te dama 're ropisutu za'ra mono wamhã, dama ĩpire norĩ nhisi na, wa za wa te dama 're ropisutu za'ra, sena na da te ãma 're wazaze za'ra mono da, duré da te ãma 're wawawã za'ra mono tō da.

¹⁷ Tane hã ma tô duré 'Re ĩhâimana u'âsi mono hã tinhisi pire na tãma ãma ropisutu za'ra, tinhib'a'uwẽ norĩ ma hã, tinhimirosa'rata na tô sena te te ãma 're ĩsaprĩ mono õ na, ta norĩ hã te te ãma 're sazei pese za'ra mono da, 'Re ĩhâimana u'âsi mono te te tãma ĩropisutu za'ra zéb zarina, ĩwẽ hã za te te sima 're ĩwaibui mono norĩ hã.

¹⁸ 'Re ĩhâimana u'âsi mono hã sadawa nhipese õ uptabi di. Taha wa, te te dama ĩropisutuzé hã te te ãma saprĩ waihu'u õ di. Tinhisi pire na te te dama ĩropisutuzé hã te te ãma saprĩ waihu'u õ di duré. Taha wa, wa norĩ hã 'Re ĩhâimana u'âsi mono, wa'ãma 're sisaprĩ za'ra mono da, ĩtẽme 're ĩwasisa'rei mono norĩ hã wa za oto wato sina 're wahâimana za'ra, ĩwẽ uptabi zô wasina 're ĩwanhimipari u'âsi za'ra mono zé hã, wanhiptete sina wa te wasima 're tété u'âsi za'ra mono da, 'Re ĩhâimana u'âsi mono te te wama ĩpisutu za'ra zé hã.

¹⁹ Uba're tétézé hã âi ba da te mei wamhã, te za tété uba're hã, wara tō da. Tane duré, ĩwẽ uptabi zô wasina 're ĩwanhimipari u'âsi za'ra mono hã. Taha zô si wasina 're wanhimipari za'ra mono wamhã,

wanhiptete u'âsi wa za ãma 're wanomro, wapê'ẽ na wa te ãma 're wawã za'ra mono ãna. Zezusi hã wa te wasina 're ì'umnhasi za'ra mono hã sô 're ìwanhimipari za'ra mono hã ma tô âzé 'ri para u, 'Re ìhâimana u'âsi mono nhorõwa u, hâiwa ãma hã. Zazahâ ìhâpa na 'ri 're wa'wa nhitobzé wa'wai baba ma tô âzé, 'ri 're wa'wa ìwẽ uptabi u, 'Re ìhâimana u'âsi mono, dazô 're ìsãmra mono zéb u hã.

²⁰ Zezusi hã wa'udâna ma tô tamomo âzé, wawana za'ra. Ta hã te oto sasedoti ìpire uptabi na dama 're hâimana u'âsi, 'Re ìhâimana u'âsi mono ma, da'ãma romhuri'wa na. Duréihã Metizédéti hã sasedoti na pire na dama 're ìhâimana mono ne, te oto Zezusi hã pire uptabi na dama 're hâimana u'âsi.

7

Metizédétihi wasu'u

¹ Ta hã Metizédéti hã Sarẽ na 'ri nho'õmo nhisi ãma danhib'apito, ma tô dama 're hâimana. Sasedoti na te duré dama 're hâimana, 'Re ìhâimana u'âsi mono ma, da'ãma romhuri'wa na. Danhipai u dama pire uptabi na 're ìhâimana mono ma, romhuri'wa na te 're hâimana. Duréihã Abra'ã norĩ hã, danhib'apito norĩ, maparane si'uiwa na te te ãma ai'uté za'ra pari, apâ si'aba'réi ré, ma tô sôpêtê Metizédéti hã, Abra'ã hã. Taha wa, ma tô mreme pire na Metizédéti hã ãma mre, 'Re ìhâimana u'âsi mono ma, marĩ hã ìwẽ si te te tãma 're apisutu mono da, Abra'ãhã ma hã.

² Tawamhã Abra'ã norĩ hã te te da'ãma ai'uté za'ra pari, danhibro te te ì'wasari hã ma tô po'o, Abra'ã hã. Tinhiptõmo hi bâ ma tô te te po'o. Te te po'o mono pari, ma tô misi tãma tisõ, Metizédétihi

ma. Metizédétihî nhisi hã: “Danhib'apito, sena na si da'madâ'â'wa” te wasu'u. Duré ĩwaptêrêzéb amo hã “Sarê ãma danhib'apito”, ĩwaptêrêzéb amo hã. Sarê hã “rowê” te wasu'u. Taha zarina, Sarê ãma danhib'apito na ĩwaptêrêzé hã, “Danhib'apito, dama rowê nhomri'wa” te wasu'u.

³ Taha mama nhisi ui'éré hã hâimana õ di, ĩbaihã na hã, ĩna nhisi me hã. ĩhi'rata norĩ nhisi ui'éré zama, hâimana õ di duré. ĩwaptã'ázém na ãma ĩrob'ui'éré hã hâimana õ di duré, ĩdã'ázém na ĩrob'ui'éré na zama. 'Re ĩhâimana u'âsi mono 'ra ne, te pire na dama 're hâimana u'âsi ta hã, Wanhib'apito ne, sasedoti na da'ãma romhuri'wa 're hâimana u'âsi mono wa.

⁴ Metizédétî hã dama pire uptabi di. Ma'ãpé ãne na ãma rosa'rata pese za'ra wa'aba. Abra'ã hã wahi'rata uptabi hã ma tô danhibro hã Metizédétihî ma po'o, pire na dama 're hâimana mono wa, ta hã. Te te da'ãma ai'uté za'ra pari, danhibro te te apã siré ĩ'wasari hã tinhiptõmo hi bâ ma te te po'o, Abra'ã hã. Taha pari, misi ma tãma tisõ, Metizédétihî ma hã.

⁵ Réwihî nhihudu norĩ hã sasedoti na dama 're ĩhâimana za'ra mono hã, 'Re ĩhâimana u'âsi mono nhimiroti na Mozési te te ãma ĩrob'ui'éré zarina, te za danhibro hã te te dawî 're waibu, tisiré a'uwê norĩ wi, tô Izarazéhé nhihudu norĩ wi. Danhibro hã danhiptõmo hi bâ da te 're po'o za'ra mono parip si, misi te za da te tãma 're sõmri za'ra, Réwihî nhihudu norĩ ma hã. Abra'ãhã nhihudu si, siré 're hâimana za'ra mono nherê, te za te te tãma 're sõmri za'ra, Réwihî nhihudu norĩ ma hã.

⁶ Tawamhã, Metizédétî hã Réwihî nhihudu, 're hâimana mono õ nherê, ma tô Abra'ã hã danhibro

hã tãma tisõ. Tinhiptõmo hi bâ te te po'o mono pari, ma tô misi tãma tisõ. Tawamhã Metizédéti hã mreme pire na ma tô ãma mre, 'Re ìhâimana u'âsi mono ma, ìwê uptabi hã te te tãma 're apisutu mono da, Abra'ãhã ma hã. Taha ma, ma tô 'Re ìhâimana u'âsi mono hã tãma ropisutu, duréihã.

⁷ 'Re ìhâimana u'âsi mono hã ìwê hã te te dama 're apisutu mono da, ni'wa hã da'ãma mreme wamhã, ta hã pire na dama 're ìhâimana mono. ãne hã wama waihu'u pese za'ra di. Taha wa, wa za ãne na ãma waihu'u za'ra ni, Metizédéti hã Abra'ãhã ma, pire na 're ìhâimana mono zém na hã.

⁸ Réwihi nhihudu norĩ hã, sasedoti na da'ãma romhuri'wa norĩ hã te za tô te te dawí 're waibu danhibro hã, danhoprubzé da te tãma 're ìpo'o za'ra mono hã. Tane nherẽ, te za uburé ta norĩ hã 're dâ'â za'ra, Réwihi nhihudu norĩ hã. Metizédétihi si, dâ'â ãna wama 're ìhâimana mono ne, te wama 're hâimana sasedoti na hã, ìdâ'âzém na ãma ìrob'ui'éré hã ãma hâimana õ wa, ìbaihã na hã.

⁹⁻¹⁰ Réwi hã uburé sasedoti norĩ hi'rada te 're hâimana, uburé da'ãma romhuri'wa norĩ hi'rada, danhoprubzé te te dawí 're ìwaibui mono norĩ hi'rada. Metizédéti hã Abra'ã te te sõpêtê wamhã, Réwi hã zahadu poto õ di. Tane nherẽ, te Abra'ãhã hâiba 're tihâiba, tihí'rata hâiba 're. Taha wa, Abra'ã hã danhibro, Metizédétihi ma te te po'o wamhã, taha nhipai u ma duré Réwi hã tãma po'o, Abra'ãhã hâiba 're, hâimana wa. Tawamhã Metizédéti hã Réwihi ma zama pire na 're ìhâimana mono zé, te wasu'u, ã hã.

¹¹ Duréihã 'Re ìhâimana u'âsi mono hã ãma 're dahâimana wê za'ra mono da, tinhimiroti te te

dama 're anhomri mono wamhã, ma tô duré sasedoti norĩ te te da'ãma 're ãromhuri za'ra mono zéb da hã, te te dama 're awaihu'u. Sasedoti norĩ hã Réwihĩ nhĩhudu norĩ hã tinhimĩromhuri na 'Re ãhãimana u'ãsi mono ma, te te ãma 're uwaimrami uptabi za'ra mono 'wa'ãhã, taha zarina te aré 'Re ãhãimana u'ãsi mono hã te te 're da'awêsãmri, dawasédé hã taha zarina te te da'ãma 're ab'madã'ã mono õ wa aré. Tane nherê, ta norĩ hã tinhimĩromhuri na te te ãma 're uwaimrami uptabi za'ra mono õ di, 'Re ãhãimana u'ãsi mono ma hã. Taha wa, sasedoti ãhãiba amo hã Réwihĩ nhĩhudu norĩ nhĩbrob're ãsébré hã te oto dama 're hãimana, Réwihĩ nhĩhudu 're hãimana mono õ nherê, duré Arãhã nhĩhudu hã 're hãimana mono õ nherê. Metizédéti hã sasedoti na pire na dama 're ãhãimana mono ne, te ta hã dama pire uptabi na 're hãimana oto.

12 Duréihã sasedoti norĩ hã 'Re ãhãimana u'ãsi mono ma da'ãma romhuri'wa norĩ hã tinhimĩromhuri na te te tãma ãma 're uwaimrami uptabi za'ra mono õ wa, ta norĩ nhĩbrob're sasedoti ãhãiba amo hã ma tô duré ãzé. Sébré wamhã, ma tô duré 'Re ãhãimana u'ãsi mono hã tinhimĩroti té hã ãsu dama tisõ, sasedoti norĩ hãimanazém na ãsimĩroti 'rata na Mozési te te ãma ãrob'ui'éré nhowa're're.

13 Ta hã sasedoti ãhãiba amo hã danhowa're're ãsébré té hã, Wanhib'apito, te wasu'u. Ta hã Réwihĩ nhĩhudu 're hãimana mono õ di. Izarazéhé 'ra hãiba amo nhĩhudu te 're hãimana. Niwamhã ni'wa hã ãsiré Izarazéhé 'ra hãiba amo nhĩhudu hã sasedoti na dama 're hãimana mono õ di, ãsine da hã. Mare uptabi di.

14 Wanhib'apito hã Zudaha nhĩhudu, te 're hãimana. ãne hã dama waihu'u pese uptabi di,

ĩwasu'u na hã. Mozési hã, Zudaha nhihudu norĩ ãma te te dama ãma rowasu'u õ di, sasedoti na te te da'ãma 're ĩ'mairomhuri mono da hã.

Sasedoti aimawi hã Metizédétihi ne, dama 're ĩhâimana mono zé wasu'u

¹⁵ Āhã wasu'u hã wama waihu'u pese za'ra di oto. E marĩ wa. Sasedoti ĩhâiba amo hã oto danhowa're're wama sébré za'ra wa, Metizédéti hã sasedoti na dama 're ĩhâimana mono ne, 'Re ĩhâimana u'âsi mono ma da'ãma romhuri uptabi 'wa da hã oto.

¹⁶ 'Re ĩhâimana u'âsi mono nhimiroti 'rata na Mozési te te ãma ĩrob'ui'ééré zarina, ma tô Réwihi nhihudu norĩ si, sasedoti na dama 're hâimana za'ra. E tawamhã Wanhib'apito hã Réwihi nhihudu 're hâimana mono wa, ma tô âzé, sasedoti na dama 're hâimana mono da. Mare di. Ta hã Réwihi nhihudu 're hâimana mono õ di. E marĩ zarina, ma te âzé, tawamhã. Ta hã si'utõrĩ waihu'u õ wa, ma tô âzé, sasedoti na dama 're hâimana u'âsi mono da. Nimahã na hã si'utõrĩ waihu'u õ di za tô, siptete uptabi wa, duré waihu'u pese uptabi wa.

¹⁷ Duréihã, ma tô ni'wa hã ĩbaihã na ãma rob'ui'ééré ĩwasu'u na hã, 'Re ĩhâimana u'âsi mono, ti'ra ma te te ĩrotizém na hã, ãne:

“A hã, sasedoti norĩ, dama 're ĩhâimana za'ra mono ne, te za sasedoti na dama 're aihâimana u'âsi mo, duréihã Metizédéti hã sasedoti na pire na dama 're ĩhâimana mono ne.”

¹⁸⁻¹⁹ Āne wa, 'Re ĩhâimana u'âsi mono nhimiroti 'rata na Mozési te te ãma ĩrob'ui'ééré hã pire na dama 're hâimana mono õ di oto. E marĩ wa. Marĩ dai õ wa, te te ãma 're ĩda'anho'reptui mono zéb da hã. 'Re ĩhâimana u'âsi mono nhimiroti 'rata zarina, da te dasina tãma 're uwaimrami waihu'u

za'ra mono õ wa, taha na te te sima da'ãma 're aroti mono õ di, dawasédé hã te te oto da'ãma 're ã'ab'madã'ã mono õ zéb da hã, duré taha zarina te te 're ãda'awêsãmri mono da hã. Taha wa, aimawi hã ãwẽ uptabi hã ma tô 'Re ãhãimana u'ãsi mono hã wama pisutu za'ra oto, sô 're ãwanhimipari za'ra mono zéb da hã: Cristuhu si te oto sasedoti na pire uptabi na dama 're hãimana. Taha zô si wasina 're wanhimipari za'ra mono wamhã, wa za ãtẽme 're wasihutu wapẽ'ẽ 're 'rãwi, 'Re ãhãimana u'ãsi mono u hã.

²⁰⁻²¹ Duréihã sasedoti norĩ hã da'ãma romhuri'wa da, 're sisisi mono wamhã, tinhisi na mreme pire na te te tãma 're ropisutu za'ra mono õ di, 'Re ãhãimana u'ãsi mono hã. Tazahã, Zezusi hã dama sisasedoti da, 'Re ãhãimana u'ãsi mono te te oto pisutu wamhã, mreme pire na ma tô tãma ropisutu, ãne:

“Wa hã Danhib'apito uptabi, ãmreme ãpire na wa za oto aima ropisutu, ãne: ‘A hã sasedoti na te za dama 're aihãimana u'ãsi mo. Niwamhã te dawi aiwazere õ di za, ta hawimhã.’ ãne wa aima ropisutu. ãnhimiropisutu na te aima ãma ãsaprĩ da hã, mare uptabi di za.”

ãne ma tô 'Re ãhãimana u'ãsi mono hã timreme ãpire na tãma ropisutu siro, ti'ra ma, Zezusihi ma hã.

²² ãne na Zezusihi ma, timreme ãpire na te te tãma ropisutu wa, 'Re ãhãimana u'ãsi mono te te dama ãropisutuzép té ãwẽ uptabi hã te wasu'u. Duréihã 'Re ãhãimana u'ãsi mono te te dama ãropisutuzém nhipai u ãwẽ uptabi hã, te wasu'u.

²³ Duréihã sasedoti norĩ hã ahã uptabi na ma tô sisõwa're're te te da'ãma 're romhuri za'ra, 're

si'utõrĩ mono sidâpâsi.

²⁴ Tazahã, Zezusi hã nimahã na tidâ'â na te te sahu õ di za. Õne u'â te za 're hâimana u'âsi. Taha wa, sasedoti na te za tô dama 're hâimana u'âsi oto, watobro waihu'u âna dawĩ.

²⁵ Taha wa, te te 're da'anho'reptui waihu'u pese mono di ta hã, da te dasina 're ã'umnhasi za'ra mono zéb zarina, 'rãwi dapê'ê 're ãtême 're ãdasihutu mono norĩ hã, 'Re ãhâimana u'âsi mono u hã. 'Re ãhâimana u'âsi mono ma, da'ãma 're mremente mono da, dama 're hâimana u'âsi mono wa, te te 're da'anho'reptui waihu'u pese mono di, ta hã oto.

²⁶ Taha wa, te oto õhõ si sasedoti ãpire uptabi na hã wama 're hâimana za'ra, Timama ma, te te wa'ãma 're romhuri mono da. Taha si te 're timorĩ wê uptabi. Õhõ si ma tô 'Re ãhâimana u'âsi mono hã te te 're wêsãmri, marĩ te te 're ab'manharĩ wasété mono õ wa. Taha wa, ãwasédé hã sena na da te ãma 're sa'ra waihu'u za'ra mono õ di. 'Re ãhâimana u'âsi mono hã ma tô tãma pisutu, ti'ai ãma dawasété na 're ãdanomro mono norĩ nhiti 're sãmra mono da oto, hãiwa ãma danhipai u dama pire uptabi na 're hâimana u'âsi mono da.

²⁷ Duréihã sasedoti norĩ 're ãhâimana za'ra mono ne, 're hâimana mono õ di, Zezusi hã. Ta norĩ hã awê sidâpâsi te za tinhoprubzé hã si'udâna te te tãma 're sãmri 'rata za'ra 'Re ãhâimana u'âsi mono ma, tiwasété parizéb da hã. Taha pari, te za duré da'udâna zama danhoprubzé hã te te tãma 're sãmri za'ra, dawasédé te te dama ãma 're apari mono da. Tanei õ di, Zezusi hã sasedoti na te te wa'ãma 're ãromhuri mono zé hã. Niwa marĩ te te 'manharĩ wasété waihu'u õ wa, awê sidâpâsi si'udâna tinhoprubzé hã te te tãma 're anhomri mono õ di, Timama ma hã. Misi haré ma tô

tinhoprubzém na hã tãma sisõ, 'Re ìhâimana u'âsi mono ma, dazada dâ'â da, sihâiba zawi ãna tãma sisõmri wamhã, õhõ haré dawasédé hã te te oto ãma dama 're ì'apari mono zéb da hã.

²⁸ Duréhã 'Re ìhâimana u'âsi mono nhimiroti 'rata na Mozési te te ãma ìrob'ui'ééré zarina, ma tô sasedoti da, te te 're da'apisutu, 'Re ìhâimana u'âsi mono hã. 'Re danomro waseté mono wa, danhib'uware na 're dahâimana za'ra mono nherê, ma tô ãne da hã te te 're da'apisutu. Tane nherê, ma tô 'Re ìhâimana u'âsi mono hã timreme pire na ti'ra ma ropisutu, taha si sasedoti na misi wama 're hâimana za'ra mono da oto. Ta hã te uburé marĩ hã Ìmama te te tãma 're ì'apisutu mono zéb zarina, te te tãma ãma 're a'uwaimrami u'âsi, Timama ma hã.

8

Sasedoti ìpire uptabi na Zezusi hã wama 're ìhâimana mono zé wasu'u

¹ Ìhãna te aima ãma ìrowasu'u za'ra wa'aba zé hã, e marĩ te wama wasu'u za'ra, ìpire hã. Sasedoti ìpire uptabi hã te oto wama 're hâimana za'ra. Ìhã wasu'u si, ìpire uptabi hã. 'Re ìhâimana u'âsi mono 're ìsãmra mono zém nhimire niwĩ, te pire uptabi na 're sãmra u'âsi hâiwa ãma, ìwê uptabi nhimire niwĩ.

² Taha si te sasedoti ìpire uptabi na te te 're romhuri, 'Re ìhâimana u'âsi mono nhorõwa ãma ìwê uptabi 're, hâiwa ãma. Hâiwa ãma 'ri hã ni'wa te te ì'ri õ di. Tô õhõ si ma tô ìwa 're ìsãmra mono zéb da hã si'uihã na sima 'ri, Danhib'apito uptabi hã.

³ 'Re ìhâimana u'âsi mono hã ma tô sasedoti ìpire uptabi norĩ hã te te 're apisutu, danhoprubzé hã da'upana te te tãma 're sõmri za'ra mono da, ãma

're ĩwata za'ra mono zéb da hã, duré danhimizama hã da'upana te te tãma 're simroi mono da, taha na dawasédé hã te te dama ãma 're ĩ'apari mono zéb da hã. Taha zarina, ma tô duré Cristu hã tinhoprubzém na tãma sihãiba nho, 'Re ĩhãimana u'âsi mono ma, sasedoti ĩpire uptabi na taha si wama 're hãimana za'ra mono wa oto.

⁴ Cristu hã ti'ai ãma 're sãmra u'âsi mono 'wa'âhã, sasedoti na dama 're hãimana mono õ di aré. E marĩ wa. Sasedoti norĩ hã 'Re ĩhãimana u'âsi mono ma, danhoprubzé hã da'upana te te tãma 're sômri za'ra mono da, ĩwana dama 're hãimana u'âsi za'ra mono wa ta norĩ hã, zudezu norĩ 're ĩhãimana za'ra mono zéb zarina.

⁵ Da'awã da te 're 'madâ'â za'ra mono wamhã, dahãiba uptabi hã dama 're ĩhãimana za'ra mono na te za da te 're waihu'u za'ra. Tane nherê, da'awã si hã marĩ hã ãma 're hãimana mono õ di. Tane duré, ti'ai ãma 'Re ĩhãimana u'âsi mono nhorõwa hã, sasedoti norĩ hã ĩ're te te da'ãma 're ĩromhuri za'ra mono zé hã. Hãiwa ãma 'Re ĩhãimana u'âsi mono nhorõwa awã ne, te ta hã 're hãimana. Aiwab uptabi õ di. Hãiwa ãma ĩsõrõwa si, ĩwê uptabi hã. Duréihã Mozési hã romhã 'manharĩ na 'ri hã 'Re ĩhãimana u'âsi mono ma, te te 'manharĩ õ ré, ma tô 'Re ĩhãimana u'âsi mono hã ãne hã tãma pisutu: "Ëtê 'rãihã na asãmra ré, romhã 'manharĩ na 'ri 'manharĩ da, te aima ĩpisutuzéb uwaibaba si, te za ĩ'manha." ãne ma tô 'Re ĩhãimana u'âsi mono hã tãma waihu'u, Mozésihi ma hã.

⁶ Tane nherê, 'Re ĩhãimana u'âsi mono hã ma tô oto tãma pisutu Zezusihi ma, taha si te te oto da'ãma tãma 're romhuri mono da, pire uptabi na, sasedoti norĩ te te da'ãma 're ĩromhuri za'ra mono zém nhipai u. Tane duré, 'Re ĩhãimana u'âsi mono

te te dama ĩropisutuzép té hã, Cristu hã 'Re ĩhâimana u'âsi mono ma, te te wa'ãma 're ĩ'ab'madâ'â mono hã. Wẽ uptabi di ta hã, duréihã 'Re ĩhâimana u'âsi mono te te dama ĩropisutuzéb 'rata ma hã. Danhipai u uptabi hã, marĩ ĩwẽ uptabi na te te dama 're aropisutu mono wa, te wẽ uptabi na dama 're hâimana, te te dama ĩropisutuzép té hã.

⁷ 'Re ĩhâimana u'âsi mono te te dama ĩropisutuzéb 'rada hã wẽ uptabi 'wa'ãhã, te aré tô õhõ si dama 're hâimana u'âsi. Te te dama ĩropisutuzép té hã te te aré dama pisutu õ di.

⁸ Tane nherẽ, 'Re ĩhâimana u'âsi mono hã te te dama ĩropisutuzéb 'rada hã ma tô 'rãwi siwi wẽ'õ.

Ãne na ma tô dama ãma rowasu'u, duréihã:

“Wa hã Danhib'apito uptabi, wa za oto aima rowasu'u za'ra wa'wa, ãne: Nimahã na hã Izarazéhé nhihudu norĩ ma, wa za ĩnhimiroti té hã tâma pisutu za'ra, Zudaha nhihudu norĩ ma zama.

⁹ Ta norĩ hi'rata norĩ ma, te ĩropisutu 'rata ne, 're hâimana mono õ di za, te dama ĩropisutuzép té hã. ĩhi'rata norĩ hã Ezitu hawi te simroi mono wamhã, te tâma ĩropisutu za'ra zé wa'rãmi, ĩnhimiroti hã te te 're 'madâ'â za'ra mono õ di, ta norĩ hã. Taha wa, wa tô ta norĩ wi tiwi aipi'ra za'ra, si'uihã na 're hâimana za'ra mono da oto.

¹⁰ Tane nherẽ, nimahã bâtã na wa za te dama ĩropisutuzép té hã tâma pisutu za'ra Izarazéhé nhihudu norĩ ma hã, duréihã te dama ĩropisutuzém nhowa're're. Ã hã, wa wa hã Danhib'apito uptabi hã aima wasu'u za'ra wa'wa, ĩnhimiroti tém na te dama ĩropisutuzé hã.

Tawapsi wa za ĩnhimiroti hã ĩpẽ'ẽ 're te tãma 're anhomri, ĩré 're nomro u'âsi mono wa, te te 're 'madâ'â pese za'ra mono da.

Ta norĩ nhib'apito, wa za oto tãma 're ĩhâimana za'ra. Tawamhã ĩnhib'a'uwẽ na si te za tô ta norĩ hã ĩma 're hâimana za'ra.

11 Wa hã Danhib'apito uptabi hã, ĩnhib'a'uwẽ norĩ te te 're ĩwaihu'u za'ra mono da, te te sima 're ĩwasu'u za'ra mono zéb zarina si, te te 're ĩwaihu'u za'ra mono õ di za oto ta norĩ hã. Duré ĩsisânawã norĩ te te tãma 're ĩwasu'u za'ra mono zéb zarina si, te te 're ĩwaihu'u za'ra mono õ di za. Si'uihã na te za ĩnhib'a'uwẽ norĩ hã tipẽ'ẽ na te te 're ĩwaihu'u za'ra oto, dama wapu na 're ĩhâimana za'ra mono norĩ hã, duré dama pire na 're ĩhâimana za'ra mono norĩ zama.

12 ĩwasédé hã te ãma 're ab'madâ'â mono õ di za oto. Marĩ te te 're ĩ'manharĩ wasété za'ra mono zém na hã 're ĩsipo're pu'u mono õ di za duré."

Ãne 'Re ĩhâimana u'âsi mono te te dama ĩropisutuzép tém na te te ĩrowasu'uzé hã.

13 Duréihã 'Re ĩhâimana u'âsi mono te te dama ĩropisutu 'rata nhowa're're, te te dama ĩropisutuzép té hã te te dama pisutu wamhã, marĩ dai õ di oto, ĩsimiropisutu 'rada hã. Taha wa, te za oto ai'utõ, marĩ ĩ'ratare hã 're ĩsi'utõrĩ pese za'ra mono ne.

9

Romhã 'manharĩ na 'ri wasu'u

1 'Re ĩhâimana u'âsi mono hã duréihã tinhimiropisutu 'rada hã te te dama sômri wamhã, ma tô dama pisutu za'ra, ãma 're ĩdawata za'ra

mono zéb da hã. Zâmorĩ za'ra ré, danhimizahâri sidâpâsi, romhâ 'manharĩ na 'ri hã da te dasiwi ãsimizusi mono zéb da hã, ma tô duré dama pisutu, ãma 're ãdawata za'ra mono zéb da hã, duré ãwa 're ãsãmra mono zéb da zama.

² Duréihã romhâ 'manharĩ na 'ri hã danhimizahâri sidâpâsi, 'Re ãhãimana u'ãsi mono ma, da te dasiwi 're ãsimizusi mono hã maparane te 'ri 're wa'wa hã 're hãimana zahuré. 'Ri 're wa'wa ãmorĩ'rata ãma, te rob'uiwézé sima'warazé hã 're sa. Wedeza hã te duré ãwa 're sa, ã'u'êne hã 'Re ãhãimana u'ãsi mono ma, ãwa da te 're ãsa'ra mono zéb da hã. 'Re ãhãimana u'ãsi mono te, 'ri 're wa'wa hã ãwē uptabi na ãsisi hã.

³ Duré zazahã ãhãpa na 'ri 're wa'wa nhitobzé babarã niwĩ, 're ãhãimana mono hã maparane ãma 'ri 're wa'wa hãiba amo nhisi hã, 'Re ãhãimana u'ãsi mono te, danhipai u ãwē uptabi hã, ãwa 're ãsãmra mono zém na taha nhisi hã.

⁴ Tame te êtē'ubuzi pré oru 'manharĩ na wedeza ne hã 're sa, 'Re ãhãimana u'ãsi mono ma, wedewa'u zadaze zatazéb da hã. Wedehã're hã te duré 'ri para 're sa. Wedehã're mana wawimhã, oru 'manharĩ. Duréihã rob'ui'ééré na 'Re ãhãimana u'ãsi mono te te dama ãropisutuzém na, wedehã're nhisi hã. Wedehã're 're, te oru 'manharĩ hã simhi ne hã 're sa, mana na dasa nhisi hã ã're 're ãsa'wari mono hã. Arãhã nhiwedehu zama te duré wedehã're wa 're sa'wari, duréihã 'Re ãhãimana u'ãsi mono nhimipawaptobzéb zarina, wedehu na ãsuire 're ãwairébé mono hã. Rob'ui'ééré hã te duré ãwa 're sa'wari zahuré, 'Re ãhãimana u'ãsi mono hã te te tinhib'a'uwē norĩ ma ãropisutuzém na rob'ui'ééré hã, êtē tōmo baihã na.

⁵ Wedehã're nhisiwi te duré ropodo hã 're

sima'wara zahuré, rob'manharĩ hã ropoto hãiba hã ĩsaripi ré hã. 'Re ĩhãimana u'âsi mono, tame 're ĩsãmra mono zé, te ta norĩ hã wasu'u zahuré. Wedehã're nhisiwi, te ta norĩ hã 're papo zahuré. Wedehã're nhitobzé nhisi hã 'Re ĩhãimana u'âsi mono, dawasédé te te dama 're ĩ'apari mono zém na ĩsisi hã. Āne duréihã romhã 'manharĩ na 'ri wasu'u hã. Tane nherẽ, āhãna hã te āma aima rowasu'u uptabi za'ra wa'aba õ di. Syry na wa tô āma aima rowasu'u za'ra wa'wa.

⁶ Āne ma tô danhimizahãri sidâpãsi 'ri paramhã marĩ hã sipu'u pese na ĩwa da te 're sa'ra. Tawamhã sasedoti norĩ hã 'Re ĩhãimana u'âsi mono ma da'āma romhuri'wa norĩ hã awẽ sidâpãsi ma tô 're sisisi, 'ri 're wa'wa ĩmorĩ'rata u hã, tame ĩwa tinhimiromhuri mono bâ marĩ na te te 're romhuri za'ra mono da.

⁷ Tane nherẽ, sasedoti norĩ nhib'apito, tisiré norĩ ma ĩpire uptabi si ma tô maparane āma 'ri 're wa'wa u 're zasi, 'Re ĩhãimana u'âsi mono te hã, danhipai u ĩwẽ uptabi hã ĩwa 're ĩsãmra mono zéb u hã. Wahub sidâpãsi ma tô misi haré 're zasi. Tamomo 're zasi mono wamhã, danhimizama wapruĩ ré, te 're zasi, dawasété parizéb da hã, 'Re ĩhãimana u'âsi mono ma, te te tãma 're sômri mono da, si'udãna, duré da'udãna zama, duré da te dasina 're waihu'u za'ra mono õ nherẽ, dawasédé da te 're ĩ'manharĩ za'ra mono zé parizéb da hã.

⁸ E marĩ te tawamhã wama wasu'u za'ra āne hã, duréihã sasedoti norĩ hã 'Re ĩhãimana u'âsi mono ma, te te da'āma 're ĩromhuri za'ra mono zé hã. 'Re ĩhãimana u'âsi mono pẽ'ězani hã ma tô āne hã wama waihu'u za'ra. Duréihã romhã 'manharĩ na 'ri āma hã, 'ri 're wa'wa ĩmorĩ'rata u danhimizama hã dawasété parizéb da, 'Re ĩhãimana u'âsi mono

ma, da te 're ĩsimroi mono zé hã, zahadu 're hãimana mono ré, te 'ri 're wa'wa hãiba amoi u da hã sitom haré 're sa dawi, zahadu. Taha wa, 'Re ĩhãimana u'âsi mono, ĩwa 're ĩsãmra mono zéb u hã, zahadu ĩtẽme 're danhisisi waihu'u mono õ di. Āhã wasu'u, te ã hã wama wasu'u za'ra.

⁹ E marĩ te duré wama wasu'u za'ra, 'ri 're wa'wa ĩmorĩ'rata ãma danhimizama ĩwa da te 're ĩzata za'ra mono zé hã. Danhimizama hã dawasété parizéb da, da te tãma 're ĩsõmri za'ra mono zém na, dapẽ'ẽ 're dadâ'â u'âsi ne 're ĩdanomro mono zéb zarina, dawasété si da te 're 'manharĩ za'ra mono wa, 'rãwi 're ĩdasiwẽ'õ u'âsi za'ra mono zé hã da te dasima ãma 're pari waihu'u za'ra mono õ di, dasi'uihã na hã.

Duré, 'Re ĩhãimana u'âsi mono ma danhoprubzé hã, ãma 're dawata za'ra mono da, da te tãma 're ĩsõmri za'ra mono zém na hã da te dasima 're pari waihu'u za'ra mono õ di, dapẽ'ẽ 're dadâ'â u'âsi ne 're ĩdanomro mono zéb zarina, dawasété si da te 're 'manharĩ za'ra mono wa, 're ĩdasiwẽ'õ u'âsi za'ra mono zé hã. Āne, wa te oto ãma 're ĩwaihu'u za'ra mono zé hã, ã hã ĩpire wasu'u na hã.

¹⁰ 'Re ĩhãimana u'âsi mono ma, danhoprubzé, da te 're ĩsõmri za'ra mono zé hã dapẽ'ẽ 're, da te dasima 're ĩrosa'rata za'ra mono zém na te te wama rowasu'u õ di. Taré dasa hã marĩ, da te 're ĩhuri mono zém na roti te wasu'u, duré marĩ wa'u, da te 're ĩ'âhuri mono zém na rowasu'u zama, duré 're dasihãiba wasété za'ra mono tõ da, 're ĩdasi'upsõi pese za'ra mono zém na zama roti. Ā norĩ na roti hã taré sõ'awi dahãiba na roti, ma tô dama 're hãimana za'ra. Tane nherẽ, 'Re ĩhãimana u'âsi mono hã 're ĩdanomro mono zép té hã, te te dama

ĩpisutuzép tép ãma, ma tô oto dawı ai'utõ, ã norĩ na roti 'rada hã.

11 Cristu hã ma tô oto sisasedoti tô, sasedoti ĩpire uptabi na dama 're hãimana mono da, 're ĩdanomro mono zép té hã ĩwẽ uptabi hã te te dama 're ab'madã'ã mono da oto. Tawamhã, hãıwa ãma 'ri hã, 'Re ĩhãimana u'ãsi mono hã ĩwa 're ĩsãmra mono zéb u, ma tô oto ãzé Cristu hã, danhib'rata na da te dasıwi ĩ'ri õ u, ropoto wazari ti'ai ãma 're ĩsa mono õ u. Ti'ai ãma romhã 'manharĩ na 'ri nhıpai u, wẽ uptabi di 'ri hã, hãıwa ãma hã. Pire uptabi na te ta hã 're sab u'ãsi.

12 Tawamhã Cristu hã hãıwa ãma 'ri 're wa'wa u sébré wamhã, misi haré ma tô wanhowab za'ra ãzé, 'ri 're wa'wa ĩwẽ uptabi u hã, 'Re ĩhãimana u'ãsi mono, ĩwa 're ĩsãmra mono zéb u hã. Tamomo ĩtẽme sébré wamhã, e pone'ẽrebãı waprui ré ma tô ãzé. E powawẽ 'ra waprui ré zama, ma duré ãzé, te te tãma ĩsõmri da hã, duréihã sasedoti norĩ te te tãma 're ĩsõmri za'ra mono ne hã. Mare di. Tiwaprui ré si ma tô ĩtẽme ãzé Timama u hã, te te tãma sõmri da, taha na si wawasété hawi te te 're wa'anho'reptui mono da, misi haré.

13 Sasedoti norĩ hã 'Re ĩhãimana u'ãsi mono nhimiroti 'rata na Mozési te te ãma ĩrob'ui'éré zarina, te za pone'ẽrebãı waprui hã syry na dahãıba nhısiwi te te 're sa'wari za'ra, niha wamhã, powawẽ ĩba'õmo waprui hã, marĩ na dahãıba mana wawip si 're dasihãıba wasété za'ra mono wa, apã te te ãma 're dahãıba wẽ za'ra mono da, taha zarina pıbu pese na 'Re ĩhãimana u'ãsi mono ãma 're dawata za'ra mono da. Niha wamhã, powawẽ 'ra sipi'õ hã da te 're 'wa'a pese za'ra mono wa, taha pro hã 're ĩsi'ru'a za'ra mono hã te za duré ta norĩ

hã te te dahâiba nhisiwi 're sa'wari za'ra, te te ãma 're dahâiba wẽ za'ra mono da, duré taha na hã.

14 ãne hã duréihã danhimizama wapru na dahâiba mana wawi marĩ na 're ĩdasihâiba wasété za'ra mono parizéb da hã, wẽ nherê, taha nhipai u, Cristuhu wapru si siptete uptabi di, dawasété parizéb da hã. E marĩ wa. Taha si wasété ãna 're hâimana u'âsi mono wa. Taha wa, 'Re ĩhâimana u'âsi mono pẽ'ẽzani waihu'u pese zarina ma tô wazada sisõmri za'ra 'Re ĩhâimana u'âsi mono ma, wazada dâ'â da, tiwapru na te te 're wa'a'upsõi mono da, wapẽ'ẽ 're wadâ'â u'âsi ne 're ĩwanomro mono zéb zarina, wawasété si wa te 're 'manharĩ za'ra mono wa, 'râwi 're ĩwasiwẽ'õ u'âsi za'ra mono zé hã te te oto wama 're aparĩ mono da. Taha zarina, wa za oto 'Re ĩhâimana u'âsi mono ma si, wa te 're romhuri za'ra, wawẽ na si wahâimanazém na wa te 're upa za'ra mono ãna.

'Re ĩhâimana u'âsi mono te te dama ĩropisutuzép té wasu'u

15 Taha wa, te oto Cristuhu si te te da'ãma 're ab'madâ'â, 'Re ĩhâimana u'âsi mono te te dama ĩropisutuzép té hã. Tidâ'ázém na ma tô da'awa'â Cristu hã, dawasété na 're ĩdanomro mono zém hawi te te 're da'anho'reptui mono da, zahadu 'Re ĩhâimana u'âsi mono te te dama ĩropisutuzéb 'rada hã dama 're hâimana mono ré. Taha zarina te za oto 'Re ĩhâimana u'âsi mono hã tinhib'a'uwẽ da, te te 're ĩ'apisutu mono norĩ hã te te sima 're awaibu, ĩwẽ uptabi na te te tãma 're ĩ'aropisutu mono zéb ré si, 're hâimana u'âsi za'ra mono da ĩré, ta norĩ hã.

16-17 Ni'wa hã dâ'â õ ré, te za tinhibrom na sisa'u dama roti, ĩ'uĩrĩ na si da te niha dasima ĩpo'o mono da hã. Sisõ'a ré, te za ãne na hã ãma rob'ui'ééré ĩbahã

na hã, pibu pese na ãsibro hã ã'uirĩ na da te dasima ãpo'o mono zéb da hã. Tawamhã, e zahadu dâ'â õ ré, te za te te sima po'o, ãsimi'ui'ééré zarina, te te tãma ãroti za'ra zéb zarina. Mare di. ã'uirĩ na si te za tô ta norĩ hã ãsibro hã te te sima po'o, ãdâ'ázém na te te waihu'u za'ra wapsi. Tane duré, 'Re ãhãimana u'ãsi mono te te dama ãropisutuzé hã.

¹⁸ Duréihã sasedoti norĩ hã danhimizama te te 're ãsimroi mono wapru na te te da'ãma 're romhuri za'ra mono õ 'wa'ãhã, 'Re ãhãimana u'ãsi mono te te dama ãropisutuzéb 'rada hã pire na aré dama 're hãimana mono õ di. Taré te aré dama 're hãimana.

¹⁹ Duréihã Mozési hã ãmorĩ'rata na ma tô uburé 'Re ãhãimana u'ãsi mono nhimiroti na dama rowasu'u. Taha pari, ma tô powawẽ wapru hã â na waza, pone'ërebâi wapru zama. Tawamhã wesuirã suiro panhipti hã ma tô sada si'ë za'ra. Taha pari, simisutu ma tô pone'ërebâ zéré na wasisi, da te ãséré pré na. Tawamhã danhimizama wapru na ma tô ãma di'i, â wazari powawẽ wapru na hã. Tawamhã ãbaihã nhisiwi ma tô wesuirã suiro panhipti wasi hã sãsã'ã, danhimizama wapru na te te ãma di'i da, 'Re ãhãimana u'ãsi mono nhimiroti na rob'ui'ééré ré nhisiwi. Dahãiba nhisiwi zama ma tô duré te te sãsã'ã, te te ãma da'ahãiba di'i mono da, danhimizama wapru na.

²⁰ Tawamhã Mozési hã ãne na te duré dama roti: “Ã danhimizama wapru hã 'Re ãhãimana u'ãsi mono te te aima ãropisutu za'ra wa'aba zé hã, pire na oto aima 're ãhãimana za'ra wa'aba mono da hã, te aima wasu'u za'ra wa'wa. Taha wa, te te aima ãma ãroti za'ra wa'aba zéb zarina, te za oto 're ã'madã'ã pese za'ra wa'aba mo, tãma ãma 're uwaimrami za'ra

wa'aba mono da.”

Ñe te Mozési hã dama ãma roti.

²¹ Tawamhã romhã 'manharĩ na 'ri nhisiwib zama, ma tô duré wesuirã suiro panhipti wasi hã sãsä'ã, danhimizama wapru na te te ãma di'i da. Uburé marĩ hã 'Re ãhãmãna u'ãsi mono ãma 're ãdawata za'ra mono zéb da, 'ri para 're ãsimasa mono nhisiwib zama ma duré sãsä'ã, te te ãma adi'i mono da.

²² Tane tô. 'Re ãhãmãna u'ãsi mono nhimiroti 'rata na Mozési te te ãma ãrob'ui'éré zarina, ma tô danhimizama wapru na marĩ hã da te ãma 're di'i za'ra, 'ri para 're ãsimasa mono hã, wasété ãna 're simasa mono da, 'Re ãhãmãna u'ãsi mono ma hã. Dahãiba wib zama, ma tô duré ãma 're dasihãiba di'i za'ra, 'Re ãhãmãna u'ãsi mono ma, dahãiba wasété ãna oto 're dahãimana za'ra mono da. Danhimizama hã da te 're simroi mono wa, ãwapru hã tiwi 're ãsisa'wari za'ra mono na si, te za ãma 're dasihãiba wẽ za'ra dahãiba mana wawip si, marĩ na 're dasihãiba wasété za'ra mono wamhã.

Cristu hã Timama ma dazada ãsĩõmrizé wasu'u

²³ ã norĩ hã ti'ai ãma romhã 'manharĩ na 'ri hã, duré uburé marĩ hã ãwa 're ãsimasa mono hã, hãiwa ãma 're ãhãmãna za'ra mono ne, te 're hãmãna za'ra. Tane nherẽ, aiwab uptabi õ di, marĩ ãpire da, 're hãmãna za'ra mono õ nherẽ, 'ri hã ti'ai ãma hã, duré uburé ãwa 're ãropsimasa mono hã. Ta hã ma tô sasedoti norĩ hã danhimizama wapru na te te 're di'i za'ra, taha zarina si 'Re ãhãmãna u'ãsi mono ma, wasété ãna 're hãmãna za'ra mono da. Tane nherẽ, hãiwa ãma marĩ hã sena 're ãhãmãna za'ra mono hã ãwẽ na si, 'Re ãhãmãna u'ãsi mono ma, 're hãmãna za'ra mono da, ma tô ãwẽ uptabi hã sada dãrã.

24 Āne wa, Cristu hã dâ'â pari hâiwa'utu wa, ti'ai ãma danhib'rata na 'ri 're, sébré õ di, 'Re ãhâimana u'âsi mono hã ãwa 're ãsãmra mono zéb u hã. E marĩ wa. Ta hã ti'ai ãma 'ri hã, taré hâiwa ãma 'ri ã'uptabi ne si 're hâimana mono wa, ã'uptabi õ wa. Hâiwa ãma 'Re ãhâimana u'âsi mono hã ãwa 're ãsãmra mono zéb u si ma tô ãzé Cristu hã, tame te te oto wa'ãma 're romhuri u'âsi mono da, Timama nho'a.

25 'Re ãhâimana u'âsi mono ma, da'ãma romhuri'wa ãpire uptabi hã ma tô duréihã siwaprosi ãtẽme 're zasi, 'Re ãhâimana u'âsi mono te, 'ri 're wa'wa ãwẽ uptabi u hã, sasedoti ãpire uptabi hã. Wahub sidãpãsi ma tô ãtẽme 're zasi misi haré, danhimizama wapru hã te te tãma 're sãmri mono da, da'udãna. Tane nherẽ, Cristu hã wahub sidãpãsi hâiwa ãma 'Re ãhâimana u'âsi mono hã ãwa 're ãsãmra mono zéb u hã, ãtẽme 're zasi u'âsi mono õ di. Misi haré ma tô ãtẽme ãzé, Timama u hã, õhõ haré dazada tãma sisãmri wa, Timama ma hã.

26 Cristu hã wahub sidãpãsi 'Re ãhâimana u'âsi mono ma, dazada 're sisãmri u'âsi mono 'wa'ãhã, te aré ropoto na'rata hawim haré dazada 're dâ'â u'âsi. Tawamhã robzépata za'ëtẽ na te aré tô te te 're robzépata u'âsi. Tane nherẽ, za rob'rãsutu u ãrob'umhutuzéb u si ma tô misi haré tãma sisõ, 'Re ãhâimana u'âsi mono ma hã, dazada dâ'â da, taha zarina dawasédé hã te te dama 're apari mono da oto, 'Re ãhâimana u'âsi mono hã.

27 Misi haré te za aihĩni 're dadâ'â za'ra. Taha parip si te za 'Re ãhâimana u'âsi mono hã niwapsi da'awaihu'u, dawẽ na dawasété na zama, taha zarina te te dama arowairébé mono da oto.

28 Tane ma tô duré Cristu hã misi haré dazada dârã, dawasédé hã da'ahã na te te oto dama ãma

're ã'apari mono zéb da hã. Tawamhã ti'ai u apã wei morĩ zahu wamhã, dazada dâ'â da, wei morĩ õ di za oto, taha zarina dawasédé hã te te duré dama 're ã'apari mono da hã. Mare di. Sô 're ãsimipari za'ra mono norĩ si, te te oto ãsõ'reptu pese za'ra da si, te za wei mo apã Cristu hã, ta norĩ zô si.

10

¹ 'Re ãhãimana u'âsi mono nhimiroti 'rata na Mozési te te ãma ãrob'ui'ééré zarina, ãwê hã oto wama 're ãhãimana za'ra mono zém na wa te ãma 're waihu'u uptabi za'ra mono õ di. Wahub sidãpãsi ma tô danhimizama hã dasi'udãna da te tãma 're simroi u'âsi, 'Re ãhãimana u'âsi mono ma hã, da te 're sahãri za'ra mono ãna. Tane nherê, danhimizama da te tãma 're ãsimroi mono zé hã sib'uware di, dawasédé hã tô sena te te dama 're ã'apari mono da hã, ãma 're dawata za'ra mono da, 'rãwi dapê'ê 're 'Re ãhãimana u'âsi mono u 're ãdanomro mono norĩ ma hã. Dapê'ê 're, rowê na 're ãdahãimana za'ra mono zéb da hã, sib'uware di tô, 'Re ãhãimana u'âsi mono ma, danhimizama da te 're ãsimroi mono zé hã.

² 'Re ãhãimana u'âsi mono ãma 're ãdawata za'ra mono norĩ hã danhimizama hã dasi'udãna da te tãma 're ãsimroi mono zém na, õhõ haré dawasédé hã te te dama 're apari uptabi mono 'wa'ãhã, taha zarina 'rãwi 're dasiwê'õ u'âsi za'ra mono õ di aré, dawasété na hã. Taha zarina te aré oto danhimizama pãrĩ hã da te 're sahãri za'ra.

³⁻⁴ Tane nherê, powawê ãba'õmo wapru hã duré pone'ërebãi wapru hã dawasédé hã te te dama 're pari uptabi za'ra mono õ di. Taré te za danhimizama hã wahub sidãpãsi dasi'udãna 'Re ãhãimana u'âsi mono ma, da te 're ãsimroi mono zéb

zarina, ãma 're dasipo're pu'u u'âsi za'ra, dawasété ré 're ãdahâimana za'ra mono zém na hã.

⁵ Taha wa, Cristu hã ti'ai u wei ãmorĩzéb u, ma tô Timama ma tinha, ãne:

“Danhimizama na duré dasazém na aima 're danhoprub za'ra mono da, a hã asina sô 're asimipari mono õ di.

Tane nherê, ãhãiba hã ma tô ãma ãsõ, da'upana ãsina aima ãnhoprub da hã.

⁶ Danhimizama hã dawasété parizéb da, wahuré da te aima 're ãzata za'ra mono zém na zama, 're atoi mono õ di. Duré dawasété parizéb da, danhoprubzé, da te aima 're ãsõmri za'ra mono na zama, asima 're atoi mono õ di.”

⁷ ãne te duré tãma tinha, Timama ma:

“Re ãhãimana u'âsi mono, wa hã wa wei ãwa mo ti'ai u, ãma ãpisutuzéb zarina, te oto ãsina aima ãma uwaimrami da, ãbahã na ãwasu'u na duréihã da te ããma ãrob'ui'ééré za'ra zéb zarina.”

ãne ma tô Cristu hã Timama ma siwasu'u.

⁸ ãne ma tô Cristu hã ãmorĩ'rata na Timama ma rowasu'u, tô: “Danhimizama da te aima 're ãzata za'ra mono zô, duré dasazém na aima 're ãdanhoprub za'ra mono zô, asina 're asimipari mono õ di a hã, dawasété parizéb da hã. Asima ãma 're atoi mono õ di, taha na hã.” ãne na ma tô Cristu hã Timama ma rowasu'u, Mozési hã ãsimiroti 'rata na te te ãma ãrob'ui'ééré zarina, ãne hã da te 're manharĩ za'ra mono nherê.

⁹ Taha pari, ma tô duré Timama ma siwasu'u, ãne: “ãwa wa tô wei wa hã ti'ai u mo, ãma ãpisutuzéb zarina, te oto ãsina aima ãma uwaimrami da.” ãne ma tô Cristu hã Timama ma

siwasu'u, duréihã dawasété parizéb da, danhimizama na duré dasazém na 'Re ãhâimana u'âsi mono ma, 're ãdanhoprub za'ra mono zé hã te te oto dawi sina sizâri da, taha nhowa're're tihâiba na tâma sôprub da oto, taha na si dawasédé hã te te dama ãma 're ã'apari mono zéb da hã.

¹⁰ Zezu Cristu hã 'Re ãhâimana u'âsi mono te te tâma ãpisutuzéb zarina, te te tâma ãma uwaimrami wa, tihâiba na tâma sôpru wa, ma tô te te 're wa'a'upsô wawasété hawi, tâma 're wanomro wê mono da oto. Misi haré ma tô tâma sisô, dazada dâ'â da, tô ôhõ na si dawasédé hã te te dama ãma 're ã'apari mono da.

¹¹ Sasedoti norã hã awê sidâpâsi te te da'ãma 're romhuri za'ra, 'Re ãhâimana u'âsi mono nhorõwa ãma. Danhimizama na 're ãdanhoprub za'ra mono zé hã te ahâ uptabi na te te tâma 're sômri za'ra, 'Re ãhâimana u'âsi mono ma, tô ôhõ si. Tane nherê, ã norã hã danhimizama na 're ãdanhoprub za'ra mono zé hã, dawasédé hã te te dama 're pari waihu'u za'ra mono õ di.

¹² Cristuhu si, ma tô misi haré tihâiba hã tâma tisõ, dazada dâ'â da, ôhõ haré dawasédé hã te te dama ãma 're ã'apari mono zéb da hã. Taha pari, te 'Re ãhâimana u'âsi mono nhimire niwã 're sãmra, pire uptabi na ãsiré te te 're da'ab'madâ'â mono da oto, õne u'âsi.

¹³ Tame te oto Cristu hã sô 're simipari u'âsi, 'Re ãhâimana u'âsi mono hã tinhitob'ru norã nhiptetezé hã te te tiwi ã'uprosi za'ra zéb zô hã, tâma sib'uwa uptabire na 're hâimana za'ra mono da oto, ta norã hã.

¹⁴ Misi haré 'Re ãhâimana u'âsi mono ma, dazada sisômri wa, ma tô dawasété hawi te te

're da'awaibu, 'Re ïhâimana u'âsi mono nhib'a'uwẽ si oto ãma 're danomro wẽ mono da.

15 'Re ïhâimana u'âsi mono pẽ'ẽzani hã ma tô ãne na wama waihu'u za'ra, sena na wa te wasina 're waihu'u za'ra mono da. ãne te te wama ãma ïwaihu'u na'rata za'ra zé hã:

16 “Nimahã båtã na wa za, te dama ïropisutuzép té hã, dama pisutu, duréihã te dama ïropisutuzém nhowa're're. ãne, wa wa hã Danhib'apito uptabi hã aima wasu'u za'ra wa'wa, ïnhimiroti tém na te dama ïropisutuzé hã.

Tawapsi wa za ïnhimiroti hã dapẽ'ẽ 're te dama 're anhomrĩ, ïré 're danomro u'âsi mono wa, da te 're 'madâ'â pese za'ra mono da, ïmreme hã.”

17 ãne ma tô duré ïwasu'u nhana'remhã wama waihu'u za'ra:

“Dawasété na 're ïsipo're pu'u mono õ di za oto, marĩ, da te 're ï'manharĩ wasété za'ra mono zém na hã. Mare uptabi di za.”

18 ãhã wamhã, dawasédé hã 'Re ïhâimana u'âsi mono te te oto dama 're ï'apari mono zéb da hã, marĩ dai õ di oto, danhimizama na tãma 're ïdanhoprub za'ra mono zé hã, dawasété parizéb da hã. Tãibã oto ta hã.

'Re ïhâimana u'âsi mono u, 'rãwi dapẽ'ẽ na 're ïdasihutu mono zé wasu'u

19 ïsisãnawã norĩ, Zesusihi wapru hã tiwi ïpu'uzém na wazada ïdã'ãzéb zarina, wa za oto wasina wapahi ãna 'Re ïhâimana u'âsi mono u 're wasihutu 'rãwi wapẽ'ẽ na, robzei u'âsi tãma 're wamreme zusi mono da. Duréihã sasedoti norĩ hã, 'Re ïhâimana u'âsi mono 're ïsãmra mono zéb

u, 'ri 're wa'wa u 're ĩsisisi mono ne, wa za oto wa norĩ hã 'rãwi ĩtẽme 're wasihutu, wasina 're wapahi za'ra mono ãna, tãma.

²⁰ Duréihã 'Re ĩhãimana u'ãsi mono 're ĩsãmra mono zéb 're, 'ri 're wa'wa nhitobzé hã zazahã ĩhãpa hã te dawĩ 're hãsipra u'ãsi pi'reba, ĩtẽme 're danhisisi tō mono da. Tane nherẽ, Cristu hã ma tō oto wama 'ridawa za'ra tidã'ázém na, zazahã ĩhãpa na 'ri 're wa'wa nhitobzé wa'wai baba, ĩtẽme 're ĩdanhisisi mono ne, wapẽ'ẽ na ĩtẽme 're wasihutu mono da, 'Re ĩhãimana u'ãsi mono u, robzei uptabi na ĩme 're wanomro u'ãsi mono da oto.

²¹ Sasedoti ĩpire uptabi na te oto wama 're hãimana. Taha si te tãma umnhasi na uburé 'Re ĩhãimana u'ãsi mono nhib'a'uwẽ norĩ hã te te 're ab'madã'ã tãma, pire uptabi na.

²² Wawasété na 're wanomro mono wa, 'rãwi 're ĩwasiwẽ'õ sãmri za'ra mono zé hã ma tō Cristu hã tiwapru na te te wama 're apari, duréihã sasedoti norĩ hã te te ãma 're dahãiba wẽ za'ra mono da, danhimizama wapru na syry na te te ãma 're ĩdahãiba di'i za'ra mono ne. Sasedoti norĩ hã 're sihãiba wasété za'ra mono ãna, 'Re ĩhãimana u'ãsi mono u 're sisisi mono da, 're ĩsihãiba upsõi pese za'ra mono ne, wa oto wa norĩ hã wahãiba upsõi pese ne tãma 're wahãimana wẽ za'ra, 'Re ĩhãimana u'ãsi mono ma si. Taha wa, wa za oto wapẽ'ẽ na 'rãwi ĩtẽme 're wasihutu, wahãimanazé sena ré si, 'Re ĩhãimana u'ãsi mono u hã, õhõ si wa te oto wasina 're ĩ'umnhasi za'ra mono zéb zarina.

²³ 'Re ĩhãimana u'ãsi mono hã wama umnhasi za'ra di, te te wama 're ĩ'aropisutu mono zéb uwaibaba, te te wama ãma 're ĩ'a'uwaimrami mono da hã. Taha wa, wanhiptete sina wa za ĩwẽ uptabi zô 're wanhimipari u'ãsi za'ra, 'Re ĩhãimana u'ãsi

mono hã te te wama ãropisutu za'ra zém na wa te 're wawã za'ra mono ãna, sena na za wama 're ãhãimana za'ra mono na wa te dama 're ãwasu'u za'ra mono zéb zarina.

²⁴ Wa za duré wasi'ãma 're wapo're pu'u u'ãsi za'ra, marĩ na 're ãwasipawaptob za'ra mono zéb da hã, duré taha zarina 're ãwasisawi pese za'ra mono zém na wa te wasima ãma 're ãuwaimrami za'ra mono zéb da hã, duré marĩ wẽ na wa te wasima ãma 're ãwa'rãmi wẽ za'ra mono zém na zama.

²⁵ Ni'wam norĩ hã Cristuhu zazei'wa dasiré 're hãimana za'ra mono wa, rowahutu u dasiré 're si'rã'õtõ mono nherẽ, ma tô ta norĩ hã rosahãri pese za'ra oto. Tane nherẽ, wa norĩ hã wasiré 're ãwasi'rã'õtõ mono zé hã wa te wasiwi sazãri za'ra õ di za. Tô'ã. Wa za tô wasiré 're wasi'rã'õtõ u'ãsi, ãma 're wasipawapto pese za'ra mono da, 'Re ãhãimana u'ãsi mono hã wa te wasina 're ã'umnhasi za'ra mono zém na si 're wanhiptete za'ra mono da. E marĩ wa. Wanhib'apito apã we ãmorĩzéb u hã bãdã hã romhutu na aima waihu'u pese za'ra wa'aba wa.

²⁶ Ni'wam norĩ hã Cristuhu wasu'uwẽ, sena na 'rãwi te te sina 're waihu'u pese za'ra mono nherẽ, duré te te sima 're ãwẽ za'ra mono zéb zarina, 're ãhãimana wasété 'rata za'ra mono zém na si 're hãimana u'ãsi za'ra mono wamhã, marĩ hã 're 'maihãimana mono õ di, ta norĩ da hã, ãwasédé te te tãma 're ãpari za'ra mono zéb da hã, ta norĩ ma hã.

²⁷ Ta norĩ hã 'Re ãhãimana u'ãsi mono zãda, 're hãimana za'ra mono wa, te za 'Re ãhãimana u'ãsi mono hã uprosi unhama ro'o za'ëtẽ na, te te siwi 're ãwẽ'õ pese za'ra mono norĩ hã. Taha u hã, te za ta norĩ hã sina pahĩ na 're simipari za'ra oto.

²⁸ Duréhã 'Re ãhãimana u'ãsi mono nhimiroti

'rata na, Mozési te te ãma ãrob'ui'ééré hã ni'wam norĩ hã te te siwi 're wẽ'õ pese za'ra mono wamhã, ta norĩ hã ma tô da te dasiwi 're simro, ãma 're dapẽ'êzé waihu'u za'ra mono ãna. Marĩ ãwasédé hã ta norĩ hã te te 're 'manharĩ za'ra mono ré, siwaptom na titômo na ã'madã'ã za'ra 'wa norĩ hã, ãwasété na te te dama 're ãwasu'u za'ra mono zéb zarina, ma tô da te dasiwi 're simro, ta norĩ hã.

²⁹ ãne, duréihã 'Re ãhãimana u'ãsi mono nhimiroti 'rata wẽ'õ'wa norĩ ma, 're ropipa za'ra mono di. E niha tawamhã za, 'Re ãhãimana u'ãsi mono 'ra, te te siwi 're ãruiwapari za'ra mono norĩ ma, 're ãromhãimana za'ra mono zé hã za. Tãma 're ropipa uptabi za'ra mono di za tô. 'Re ãhãimana u'ãsi mono hã te za tô ta norĩ hã hã za'ra za'ëtê, rob'rãsutuzéb ãma hã. Duré 'Re ãhãimana u'ãsi mono te te dama ãropisutuzép tém na, Cristu hã dazada ãdã'ãzé hã taré newa, te ta norĩ hã te te ãma 're rosa'rata upa za'ra. Ta norĩ hã te duré 'Re ãhãimana u'ãsi mono pẽ'ëzani ãma te te 're wasété u'ãsi za'ra, ãsimizawi uptabi ãma.

³⁰ Taha wa, te za tô ta norĩ hã nimahã na hã hã za'ra, 'Re ãhãimana u'ãsi mono hã. Duréihã ma tô ãne na ni'wa hã ãma rob'ui'ééré siro, 'Re ãhãimana u'ãsi mono mreme na hã. ãne na hã 'Re ãhãimana u'ãsi mono mreme hã wama waihu'u pese za'ra di oto:

“Wa hã ãsiwaprosi wa za te 're da'a'ruiwa'ãbã. ãwétési wa za te dama ãma 're awa'rãmi, marĩ, da te 're ã'manharĩ wasété za'ra mono norĩ ma hã.”

ãne duré 'Re ãhãimana u'ãsi mono mreme na rob'ui'ééré amo hã:

“Wa hã uburé Danhib'apito uptabi hã wa za ã'uwaibaba uptabi na si te 're da'ahã za'ra,

dawasété na ĩsiwaprosi te 're ĩda'awaihu'u mono zéb zarina.”

Ñe 'Re ĩhâimana u'âsi mono mreme na rob'ui'ére hã.

³¹ Ni'wam norĩ hã 'Re ĩhâimana u'âsi mono nhib'rata, 're ĩrere'e mono ne, te te 're hã za'ra mono wamhã, tãma 're ropipa uptabi za'ra mono di za, ta norĩ ma hã.

³² Ma'ãpé, ãma asipo're pu'u za'ra wa'aba, duréihã Cristu hã Danho'reptui'wa na asina 're ĩwaihu'u na'rata za'ra wa'aba mono zém na hã, 'Re ĩhâimana u'âsi mono nhimipawaptobzéb zarina. Ta hawim haré, Cristuhu zazei'wa oto 're anomro aba mono wa, marĩ na 're robzépata za'ëtê za'ra wa'aba mono nherê, ma tô asiptete sina ãma 're aihâimana u'âsi za'ra wa'aba mo, tiwi 're aipizari za'ra wa'aba mono ãna.

³³ Nimahã na hã ma tô ni'wam norĩ hã danho'a te te ai'ãma 're wasété za'ra wa'wa. Ma tô duré da te aima 're rob'manharĩ wasété za'ra wa'wa, danho'a. Duré nimahã na asiré norĩ ma, da te 're rob'manharĩ wasété za'ra mono wamhã, ma tô 're ĩpawaptob za'ra wa'aba mo, ta norĩ zu, da te aima 're rob'manharĩ wasété za'ra wa'aba mono da nherê.

³⁴ Dazazéb 're, 're ĩhâimana za'ra mono norĩ ãma 're aipê'ézé za'ra wa'aba mono zéb zarina, ma tô ta norĩ me aipê'ê na 're ĩrobzépata za'ra wa'aba mo, ĩhãiba zu. Duré asibro hã da te aiwi 're waibui wa'aba mono nherê, ma tô ato sina 're aihâimana za'ra wa'aba mo. Aiwi 're robzei'õ za'ra wa'aba mono õ di, taha na hã. E marĩ wa. Ti'ai ãma asibrom nhipai u, hãwa ãma ĩwê uptabi hã ĩsi'utõrĩ'õ hã za aima 're ĩhâimana za'ra wa'aba mono na hã aima waihu'u pese za'ra wa'aba wa.

35 Taha wa, Cristu hã aipahi ãna asina 're ĩ'umnhasi za'ra wa'aba mono zé hã asiwi 're ĩwē'õ za'ra wa'aba mono zéb zarina, 're rême za'ra wa'aba mono õ di za. Asiptete sina te za tô ãma 're anomro u'âsi aba mo. ãne 're aihâimana za'ra wa'aba mono wamhã, taha zarina te za 'Re ĩhâimana u'âsi mono hã ĩwē uptabi na aima wa'âbã za'ra wa'wa, nimahã na hã.

36 Marĩ na 're robzépata za'ra wa'aba mono nherẽ, duré Cristuhu zazei'wa 're anomro aba mono wa, da te aima 're rob'manharĩ wasété za'ra wa'aba mono nherẽ, te za tô asiptete sina, asina 're ĩ'umnhasi u'âsi za'ra wa'aba mo, tiwi 're aipizari za'ra wa'aba mono tō da. ãne zarina, asina tãma ãma 're uwaimrami za'ra wa'aba mono wamhã, 'Re ĩhâimana u'âsi mono te te aima 're ĩwē za'ra wa'aba mono zéb zarina, te za tô tãma 're anomro wē wa'aba mo. Tawapsi, te za 'Re ĩhâimana u'âsi mono hã te te aima ĩropisutu za'ra wa'aba zé hã ĩwē uptabi hã oto asina ĩ'uwaimrami za'ra wa'wa.

37 Duréhã 'Re ĩhâimana u'âsi mono zadawa wasu'u'wa hã ma tô ãne ĩmreme na rob'ui'ére, Cristuhu wasu'u na hã:

“Ta hã za we ĩmorĩ hã niwamhã oto wei morĩ wamhã, sô rowaptã'ã õ di za. Romhutu na te za tô wei mo.

38 Ni'wam norĩ hã te tãma 're ĩwē za'ra mono zéb zarina si 're ĩnomro wē mono norĩ hã, ta norĩ hã Danho'reptui'wa na te te sina 're ĩzaze za'ra mono zéb zarina si, wa za te 're awēsãmri, ĩwasédé hã te ãma 're ab'madã'ã mono õ wa za oto, ta norĩ ãma hã. ãne wa, te za rowē uptabi na ĩ'rata 're hâimana u'âsi za'ra, ta norĩ hã.

Tane nherẽ, ni'wam norĩ hã ãwi 're sipizari za'ra mono wamhã, ãma 're ãto za'ra mono õ di za oto, ta norĩ ãma hã.”

Ãne duréihã 'Re ãhâimana u'âsi mono zadawa wasu'u'wa te te ãmreme na ãma ãrob'ui'érezé hã, ãbaihã na hã.

³⁹ Tane nherẽ, ta norĩ ne, wa norĩ hã 're wahâimana za'ra mono õ di. Nimahã na 'Re ãhâimana u'âsi mono wi 're wasipizari za'ra mono õ di, ta norĩ ne. Taha wa, 'Re ãhâimana u'âsi mono hã niwamhã ta norĩ zu te te wa'uprozi õ di za. Taha si wa tô wa te wasina 're umnhasi u'âsi za'ra, te te 're ãwa'anho'reptui mono da hã. Taha zarina te za tô wa norĩ hã wa'anho'reptu, ã'rata oto 're ãwahâimana u'âsi za'ra mono da hã, 'rãwi.

11

'Re ãhâimana u'âsi mono, da te dasina 're ãumnhasi za'ra mono zé wasu'u

¹ E niha, wa te wasina 're ãumnhasi za'ra mono zé hã, 'Re ãhâimana u'âsi mono hã. 'Re ãhâimana u'âsi mono hã wa te wasina 're umnhasi za'ra mono wamhã, ta hã te te wama 're ã'apisutu mono zéb zarina, ãwẽ uptabi zô si 're ãwanhimipari u'âsi za'ra mono na, tô sena za te te wama ãma ãuwaimrami za'ra na, wa za wa te wasina 're waihu'u za'ra. Duré uburé marĩ hã watõmo na wa te 're ã'madã'ã waihu'u za'ra mono õ zama, wa za duré wa te 're waihu'u za'ra, sena na 're ãhâimana za'ra mono na hã. Ãne 'Re ãhâimana u'âsi mono hã wa te wasina 're ãumnhasi za'ra mono zé hã.

² Duréihã wahi'rata norĩ hã, 'Re ãhâimana u'âsi mono te te sina 're ãumnhasi za'ra mono zéb zarina si, ma tô 'Re ãhâimana u'âsi mono hã te te 're awẽsãmri, ta norĩ hã.

³ 'Re ìhâimana u'âsi mono, wa te wasina 're ì'umnhasi za'ra mono zéb zarina, wa tô, sena na wa te 're waihu'u za'ra, 'Re ìhâimana u'âsi mono te te ìnharîzéb zarina, marî õ uptabi ré, te te ì'aropoto mono na hã. Datõmo na da te 're ì'madâ'â waihu'u za'ra mono õ na si, ma tô te te ro'apoto, watõmo na wa te oto 're ì'madâ'â za'ra mono da hã. ãne na wa tô duré sena na wa te 're waihu'u za'ra, 'Re ìhâimana u'âsi mono si, wa te wasina 're ì'umnhasi za'ra mono zéb zarina hã.

⁴ Abé hã, 'Re ìhâimana u'âsi mono si te te sina 're ì'umnhasi mono zéb zarina, ma tô ìwê uptabi na tâma tinhopru, 'Re ìhâimana u'âsi mono ma. Ca'îhî nhibzari si, te te wêsâmri õ di, 'Re ìhâimana u'âsi mono hã. Taha wa, Abé hã 'Re ìhâimana u'âsi mono si te te sina 're ì'umnhasi mono zéb zarina, ma tô 'Re ìhâimana u'âsi mono hã wêsã, 're ìmorî wê na zama. Taha wa, ma tô Abéhé nhoprubzép si wêsã. ãne na Abé hã 'Re ìhâimana u'âsi mono te te sina 're umnhasi mono wa, duréihã dâ'â nherê, zahadu hâiba ré wama 're ìhâimana za'ra mono ne, te wama 're hâimana za'ra, taha ãma 're wasipo're pu'u u'âsi za'ra mono wa.

⁵ Duré Enoti hã 'Re ìhâimana u'âsi mono te te sina 're ì'umnhasi mono zéb zarina, ma tô hâiba ré ré mo, hâiwa u. 'Re ìhâimana u'âsi mono hã ma tô hâiba ré ré sitême ti'â. Taha wa, ni'wa te te waihu'u õ di ta hã, ìdâ'ázém na hã. Duréihã 'Re ìhâimana u'âsi mono zadawa wasu'u'wa hã ma tô ãne na rowasu'u ìbaihã na, Enotihî wasu'u na hã: “'Re ìhâimana u'âsi mono hã hâiwa u sitême te te âri õ ré, ma tô Enotihî ma 're to, 're ìmorî wê zéb zarina, 'Re ìhâimana u'âsi mono hã.”

⁶ Ni'wam norî hã 'Re ìhâimana u'âsi mono te te sina 're umnhasi za'ra mono õ nherê, ta norî ma,

're to za'ra mono õ di za, 'Re ãhâimana u'âsi mono hã. Duré ni'wam norĩ hã 'Re ãhâimana u'âsi mono ãma 're wata za'ra mono da, tip'ẽ na 'rãwi ãtẽme 're sihutu mono da, te te sima 're wẽ za'ra mono wamhã, tã sena 're ãhâimana mono na, te za te te 're saze za'ra a'ã. Duré 'Re ãhâimana u'âsi mono zã si 're ãsãpré mono norĩ ma, ãwẽ na za te te ta norĩ ma ãwa'ãbã za'ra na, te za ta norĩ hã te te sina 're umnhasi u'âsi za'ra.

⁷ Nowé hã, 'Re ãhâimana u'âsi mono si te te sina 're ãumnhasi mono zãb zarina, ma tã duré ãma saze, ropipa hã za dazã ãwatobrozém na 'Re ãhâimana u'âsi mono hã romhã ré te te ãma ãpo're pu'uzém na, zahadu marĩ hã titãmo na te te 'madã'ã õ nherẽ, Nowé hã. Taha wa, ãsimiroti zarina ma tã uba're za'ẽne hã 'manha, ti'ra norĩ hã te te ãma sã'reptu za'ra da, timro zama, duré tisania'aba norĩ zama. Taha zarina, ma tã 'Re ãhâimana u'âsi mono hã siwi da'awẽ'õ pese, dawasété na si 're dahâimana za'ra mono wa, Nowéhé si ãsimiroti hã te te 're 'madã'ã pese mono wa. Tawamhã Nowé hã, 'Re ãhâimana u'âsi mono si te te sina 're umnhasi mono wa, ma tã 'Re ãhâimana u'âsi mono hã ãma tiwata, ãne: “Ãhã si te 're timorĩ wẽ.” ãne 'Re ãhâimana u'âsi mono hã, Nowéhé ãma ãwatazé wasu'u hã.

⁸ Abra'ã hã, 'Re ãhâimana u'âsi mono si te te sina 're ãumnhasi mono zãb zarina, ma tã duré ãsimiroti na saze, tirom nhiti watobro da, darob amoi u morĩ da, ãma ãsa'ru da hã 'Re ãhâimana u'âsi mono te te tãma ãpisutu u. Tawamhã tirom hawi ma tã watobro tã, darob amoi u morĩ da, tamomomhã bãdãdi hã te te waihu'u õ nherẽ.

⁹ 'Re ãhâimana u'âsi mono si te te sina 're ãumnhasi mono zãb zarina, ma tã darob amoi ãma 're sãmra Abra'ã hã, dasiré õ nherẽ, 'Re ãhâimana u'âsi mono,

za ãma ãsa'ru da hã te te tãma ãpisutuzéb ãma. Tawamhã romhã 'manharĩ na 'ri wa, te oto 're sãmra, 'ri uptabi õ wa. Izati norĩ hã ma tô duré romhã 'manharĩ na 'ri wa, 're simasisi zahuré, Zacoho me. Ta norĩ ma, ma tô duré ropisutu zahuré, Abra'ãhã ma te te ãropisutu ne, 'Re ãhãmãna u'ãsi mono hã.

¹⁰ Abra'ã hã 'ri nho'u ãsi'utõrĩ'õ zô si ma tô 're simipari u'ãsi, 'Re ãhãmãna u'ãsi mono hã te te sima ãwê na hãiwa ãma te te dama ã'ri zô si. Taha wa, te te siwi wê'õ õ di Abra'ã hã, romhã 'manharĩ na 'ri hã wasété wa, a'ã ã're 're sãmra tõ mono da.

¹¹ Abra'ã hã 'Re ãhãmãna u'ãsi mono si te te sina 're ã'umnhasi mono zéb zarina, ma tô duré ã'ra hã tãma podo, si'ãhi uptabi nherê, duré ãmro hã Sara hã préduptéb ré, 'ra waihu'u õ nherê. 'Re ãhãmãna u'ãsi mono te te tãma ãropisutuzém na te te ãma sazei pese wa, ma tô ã'ra hã tãma podo tô.

¹² Abra'ã hã si'ãhi uptabi wa, ãdã'ãzéb u romhutu nherê, ma tô ãhãiba hawi da'ahã uptabi na dasina dahã'ã u'ãsi, ãsihudu sidãpãsi. Wasi hã hãiwa na ahã uptabi na 're ãsimasa mono ne, ma tô da'ahã uptabi na atébré ni. ã zaihã na supara, ahã uptabi na 're ãsimi'wara mono ne, ma tô atébré ni.

¹³ ã norĩ hã 'Re ãhãmãna u'ãsi mono te te sina 're umnhasi za'ra mono ré, 're dã'ã za'ra mono nherê, 'Re ãhãmãna u'ãsi mono te te tãma ãropisutu za'ra zé hã te te sima 're waibui mono õ di ta norĩ hã, ti'ai ãma hãiba ré ré 're hãmãna za'ra mono ré hã. Tane nherê, 'Re ãhãmãna u'ãsi mono te te tãma ãropisutu za'ra zé hã romhã na uptabi na za te te tãma ãma ã'uwaimrami za'ra na, sena na te te 're waihu'u za'ra mono wa, ma tô ãma 're to za'ra ta norĩ hã, ti'ai ãma 're nomro mono ré. Ma tô duré sã'awi dama 're

siwasu'u za'ra, ti'ai ãma dasiré 're ìhâimana uptabi za'ra mono ò na hã.

14 ãne na ta norĩ hã dama 're siwasu'u za'ra mono wamhã, daro hã aimawi ìtéb zô 're ìsôpré u'âsi mono zé, te wama wasu'u za'ra, taha na si za oto 're ìrob uptabi za'ra mono na hã.

15 Tirob 'rata hawi 're ìwairébé mono na te te 're rosa'rata za'ra mono ò di, ta norĩ hã. Mare di. ãne 'wa'âhã, âté apâ te aré ta norĩ hã tirob 'rata u 're nomro.

16 Tane nherẽ, daro ìwẽ uptabi zô si ma tô ta norĩ hã sima 're sôpré, hãiwa ãma sô 're ìhâimana za'ra mono zô si, ìwa 're ìsi'ubumroi u'âsi mono zéb da hã. Taha wa, 'Re ìhâimana u'âsi mono te te siwi wẽ'ò za'ra ò di, tinhib'apito na te te 're sisi za'ra mono tã da hã. Taha zarina, ma tô oto tô 'ri nho'u hã ìwẽ uptabi hã tãma 'manharĩ za'ra, ìwa 're ìsi'ubumroi u'âsi mono zéb da hã, tirop téb ãma.

17-18 Abra'ã hã 'Re ìhâimana u'âsi mono si te te sina 're ì'umnhasi mono zéb zarina, ma tô aré ti'ra hã tãma tĩwĩ Izati hã, tãma ãma ìsôprubzéb da, 'Re ìhâimana u'âsi mono hã te te pibui wamhã. Taha ò ré, ma tô 'Re ìhâimana u'âsi mono hã tãma ropisutu siro, Abra'ãhã ma hã, ãne:

“Ai'ra Izatihi hawip si, te za asihudu norĩ hã ahã uptabi na 're hâimana za'ra, asihudu sidâpâsi te aima ìropisutuzéb zarina.”

ãne na 'Re ìhâimana u'âsi mono te te tãma ropisutu nherẽ, ma tô aré Abra'ã hã ti'ra hã tĩwĩ Izati hã, ì'ra si'aibã hã misi tãma poto nherẽ. Duré ta hawip si za ìsihudu norĩ hã sitébré da nherẽ, ma tô aré tãma tĩwĩ, 'Re ìhâimana u'âsi mono ma hã.

19 Abra'ã hã ãne ma tô sima rosa'rata: “Re ìhâimana u'âsi mono ma si, waihu'u pese di, 're dadâ'â za'ra

mono nherẽ, apâ te te 're ãda'ahâiwa'utu mono da hã. Taha wa, ã'ra hã te aré tãma ãwãrã hã, te te duré waihu'u pese di, apâ te te ãma ãhâiwa'utu da hã, te te ãma ãropisutuzém na te te ãma ãma uwaimrami da hã." ãne ma tô sima rosa'rata, Abra'ã hã. Tawamhã, ã'ra Izati hã dã'ã uptabi õ nherẽ, aré dã'ã wa, apâ te te tãma ãhâiwa'utu ne, ma tô dã'ã ãna tãma tisõ apâ, 'Re ãhâimana u'ãsi mono hã.

²⁰ Duré Izati hã 'Re ãhâimana u'ãsi mono si te te sina 're ã'umnhasi mono zéb zarina, ma tô ti'ra norã ãma rowaptẽ tiwi, ãwẽ na si te te 're pawaptob u'ãsi zahuré mono da, duré ãwẽ si te te tãma 're pisutu zahuré mono da, Zaco norã ma hã Eza'uhu me.

²¹ Duré Zaco hã 'Re ãhâimana u'ãsi mono si te te sina 're ã'umnhasi mono zéb zarina, ma tô Zuzéhé 'ra norã ma rowaptẽ 'Re ãhâimana u'ãsi mono wi, ãwẽ na si te te 're pawaptob u'ãsi zahuré mono da, duré ãwẽ si te te tãma 're pisutu zahuré mono da. Taha zarina, ma tô duré tisiwazusizém na si'upari sina ãma tiwata, 'Re ãhâimana u'ãsi mono ãma, Zaco hã.

²² Duré Zuzé hã 'Re ãhâimana u'ãsi mono si te te sina 're ã'umnhasi mono zéb zarina, ma tô tidã'ãzéb u tidub'rata norã ma rowaihu'u sirõmo za'ra, Izarazéhé nhihudu norã, za Ezitu hawi ãwairébézém na hã. ãne na, 'Re ãhâimana u'ãsi mono si te te sina 're umnhasi mono wa, te duré tãma sina roti za'ra, ã'uirã na si, ãhi hã te te siwi ãri da apâ, tirob 'rata u, tamep si te te siwi sërẽ da.

²³ Duré Mozésihi mama norã hã, 'Re ãhâimana u'ãsi mono si te te sina 're ã'umnhasi zahuré mono zéb zarina, ma tô dawã simi'uri zahuré Mozési hã, 'watébrémi na tãma poto zahuré wa. Duré tãma 'madã'ã ze zahuré wa, tãma sawi uptabi zahuré

di. Taha wa, ma dawī simi'uri zahuré. A'amo hã si'ubdatõ ma tô ãma ai'utõ, te te dawī ãsimi'uri zahuré zém na hã. Apito ma, ta norĩ hã pahi zahuré õ di, 'watébrémi na 're ãpoto za'ra mono norĩ hã, te te dama 're a'rui mono nherẽ. ãne ma tô 'manharĩ zahuré Mozésihi mama norĩ hã, 'Re ãhãimana u'ãsi mono si te te sina 're umnhasi zahuré mono wa, duré ta norĩ hã.

24 Mozési hã prédu wamhã, 'Re ãhãimana u'ãsi mono si te te sina 're ã'umnhasi mono zéb zarina, ma tô dawī sisawī, Ezitu ãma apito Para'oho 'ra sipi'õi 'ra na da te dasima 're wasu'u za'ra mono tõ da, pi'õ te te ãprédum na hã.

25 Apito Para'oho nhorõwa ãma, uburé marĩ ãwasédé hã te te a'ã dame 're ã'ab'manharĩ mono da hã, te te sima wẽ õ di Mozési hã, taha na si wẽ uptabi newa ãma 're ãtoi mono da hã. 'Re ãhãimana u'ãsi mono nhib'a'uwẽ norĩ siré, te te 're ãrobzépata mono da si, ma tô sima wẽ.

26 Apito Para'oho nhorõwa ãma 're sãmra u'ãsi mono 'wa'ãhã, te aré marĩ ãwa'ãbã za'ëtẽ na tinhibro pese, Ezitu ãma uburé marĩ hã ãwa'ãbã za'ëne hã 're ãsimi'wara mono na. Ta hã marĩ wa'ãbã za'ëtẽ mono hã wẽ nherẽ, taha upana marĩ ãwẽ uptabi si ma tô sima wẽ, Mozési hã. Danho'reptui'wa da, 'Re ãhãimana u'ãsi mono te te ãpisutu ma si, te te 're robzépata mono da si, ma tô sima wẽ. ãwẽ hã 'Re ãhãimana u'ãsi mono, niwa za te te tãma ãsõmri na si, ma tô te te ãma 're rosa'rata u'ãsi, Mozési hã.

27 'Re ãhãimana u'ãsi mono si te te sina 're ã'umnhasi mono zéb zarina, ma tô duré Mozési hã watobro Ezitu hawi, apito Para'ohã te te sima simimnhasi ãna. 'Re ãhãimana u'ãsi mono hã datõmo na da te 're 'madã'ã waihu'u za'ra mono õ nherẽ,

Mozési hã titõmo na te te 're ã'madã'ã mono na ne, te te sina 're umnhasi mono wa, apã sipi'rai õ di, Ezitu u hã. Õne haré ma tô ta hawi watobro, siptete sina.

²⁸ Mozési hã 'Re ãhãimana u'ãsi mono si te te sina 're ã'umnhasi mono zéb zarina, ma tô duré Pascowa na dato hã te te 're ã'manharã za'ra mono zéb da na tãma roti za'ra Izarazéhé nhihudu norã ma hã, ta norã hã tisai 'manharã na te te ãma sãna'rata za'ra da, 'Re ãhãimana u'ãsi mono hã Mozésihi ma te te ãpisutuzéb zarina. 'Re ãhãimana u'ãsi mono si te te sina 're ã'umnhasi mono zéb zarina, ma tô duré Mozési hã tãma roti za'ra Izarazéhé nhihudu norã ma hã, tinhimizama wapru na 'ridawa zada'ré hã te te ãma sapré za'ra mono da, hãiwa ãma romhuri'wa hã Dapãrã'wa na ãwaptërë hã, aibã tãma 're ãpoto'rata za'ra mono hã te te tiwi simroi mono tõ da, Izarazéhé nhihudu norã wi hã.

²⁹ Duré Izarazéhé nhihudu norã hã, 'Re ãhãimana u'ãsi mono si te te sina 're ã'umnhasi za'ra mono zéb zarina, ma tô ã poré na saprã za'ra, zara u, ã pré na ã poré nhisi na. ã 'ré na da te 're ãsaprã za'ra mono ne, ma tô rob'ré na saprã za'ra, ã zada'ré amoi u hã, zara u. Tane nherë, ezipsiu norã hã rob'ré na dazarina te te aré saprã za'ra da, si'aba'rúi wamhã, ma tô ã hã apã ãré atob za'ra. Taha wa, ezipsiu norã hã ã poré na ma tô uburé ai'utõ.

³⁰ Duré Izarazéhé nhihudu norã hã, Zerico na 'ri nho'õmo nhisi ãma 'ri 'wawi wa'ra 'rãihã hã ma tô nasi te te uirã za'ra, sime da, 'Re ãhãimana u'ãsi mono te te tãma ãpisutu za'ra zéb zarina. Bãdã hã 7 na ma tô ãma ai'utõrã za'ra, te te nasi siwi uirã za'ra mono ré hã. Tawamhã 'ri 'wawi wa'ra 'rãihã hã ma tô aime. Ta norã hã 'Re ãhãimana u'ãsi mono si te

te sina 're ĩ'umnhasi za'ra mono zéb zarina, ma tô aime.

³¹ Duré Ra'abi hã pi'õ aré 're ĩhâimana wasété mono hã, 'Re ĩhâimana u'âsi mono si te te sina 're ĩ'umnhasi mono zéb zarina, ma tô wapsã'i'a'wa norĩ hã tinhorõwa u 'mazasi wẽ zahuré, ti'ai wẽ zô pi'uriwi dama robzabui'wa norĩ hã. Taha wa, 'Re ĩhâimana u'âsi mono hã te te dazu wĩrĩ õ di Ra'abi hã, 'ri nho'õmo âma uburé 'Re ĩhâimana u'âsi mono nhimiroti 'madâ'â'õ'wa norĩ zu hã.

³² ãne na 'Re ĩhâimana u'âsi mono si, da te dasina 're ĩ'umnhasi za'ra mono zém na, ahâ uptabi na te âma aima rob'rãzarõtõ za'ra wa'aba neza. ãhã wamhã, ĩnhimirob'rãzarõno hã te aré sina tipahã. E marĩ wa. Ahâ uptabi wa. Ahâ uptabi di tô, 'Re ĩhâimana u'âsi mono te te sina 're ĩ'umnhasi za'ra mono norĩ hã, zahadu te âma aima ĩrowasu'u za'ra wa'aba õ hã: Zidi'ã hã, duré Barati, duré Sãsã, duré Zepté, duré Dawi, duré Samuwé, duré aimawi norĩ hã uburé 'Re ĩhâimana u'âsi mono zadawa wasu'u 'rata 'wa 're ĩhâimana za'ra mono norĩ hã.

³³ Ta norĩ hã 'Re ĩhâimana u'âsi mono si te te sina 're ĩ'umnhasi za'ra mono zéb zarina, ma tô te te da'ãma 're ai'uté za'ra, 'Re ĩhâimana u'âsi mono zadawa para, daro hã te te dawĩ 're waibui mono da. Ta norĩ hã ĩwẽ si te te 're 'manharĩ u'âsi za'ra mono wa, ma tô ĩwẽ uptabi hã te te sima 're waibu, 'Re ĩhâimana u'âsi mono te te tãma ĩropisutu za'ra zéb zarina. Duré hu'u zérépa hã ma tô te te 're sadai're nhitob za'ra tinhib'rata na, te te 're simro tõ mono da.

³⁴ Ta norĩ hã ma tô duré unhama ro'o za'ẽne hã te te 're simro, siwi. Ma tô duré dawĩ 're sisõ'reptu za'ra, sib'ézé 'wapa na da te 're simroi mono da nherẽ. Sib'uware na 're hâimana za'ra mono

nherẽ, 'Re ìhâimana u'âsi mono nhimipawapto-
bzém na ma tô siptete na dazada 're hâimana za'ra.
Siptete uptabi na te te 're da'wapé za'ra mono wa,
ma tô ta norĩ hã tizahui'wa norĩ hã te te 're wano'õ
apâ, darob amoi hawi dazahui'wa norĩ hã.

³⁵ Duré pi'õ norĩ wi, aré tiwi 're ìdâ'â za'ra mono
norĩ hã, ma tô apâ tâma 're hâiwa'utu za'ra, pi'õ norĩ
ma. Duré ta norĩ hã 'Re ìhâimana u'âsi mono si te
te sina 're ì'umnhasi za'ra mono norĩ hã dazazéb
're, 're hâimana za'ra mono ré, 'Re ìhâimana u'âsi
mono te te dawì 're udâ za'ra mono 'wa'âhã, taha
zarina te aré dazazém hawi da te tâma 're rob'ru
za'ra, ta hawi 're wairébé mono da. Tane nherẽ,
ta norĩ hã 'Re ìhâimana u'âsi mono te te dawì 're
udâ waihu'u za'ra mono õ di. Taha wa, ma tô
danhimirob'manharĩ wasété na 're si'utõrĩ. Rowẽ
uptabi na 're ìdanomro u'âsi mono zéb u hã, 'Re
ìhâimana u'âsi mono si te te 're hâiwa'utu za'ra mono
da, ma tô âne zõ si 're si'madâ'â za'ra, ta norĩ hã.

³⁶ Ni'wam norĩ âma, ma tô duré 're dawa'ẽ za'ra.
Powawẽ hâiwaré 'manharĩ na ma tô da te dasiwi
're hã za'ra duré. Ni'wam norĩ hã ma tô da te 're
pawasisi za'ra, ìsi'uwazi nhorõ rutu na, dazazéb 're,
da te 're séme mono da.

³⁷ Ni'wam norĩ hã ma tô duré ẽtẽ tõmo wawẽ
na da te 're simro. Ni'wam norĩ hã ma tô duré
ìhâiba wâiwa âma 're dasiwã za'ra, wede'ézém na
ne. Sib'ézé 'wapa na ma tô duré da te 're simro.
Pone'ẽrebâi hã na si ma tô duré ni'wam norĩ hã
're si'uza za'ra. Sibrob ãna ma tô duré ta norĩ hã
're hâimana za'ra. Danhimirob'manharĩ wasété
na ma tô duré ni'wam norĩ hã te te 're robzépata
za'ra, da te 're 'ruiwapari za'ra mono wa. Æne 'Re
ìhâimana u'âsi mono si te te sina 're ì'umnhasi za'ra
mono norĩ wasu'u 'rãzarõno hã.

³⁸ Ta norĩ hã hâiwi si ma tô 're nomro a'ubuni wi,

ětě 'rãihâ u zama. Duré ětě 'rãihâ zahâpâ ětě're wa, ma tô duré dawi 're si'ubumro, ab're wab zama. Ta norĩ si ma tô 'Re ãhâimana u'âsi mono ma 're hâimana wě za'ra.

³⁹ Ta norĩ ãma si ma tô 'Re ãhâimana u'âsi mono hã 're wata za'ra uburé, ôhõ si te te sina 're umnhasi za'ra mono wa. 'Re ãhâimana u'âsi mono te te tãma ãropisutu za'ra zéb zarina, ãwě uptabi hã ti'ab ré te te sima 're waibui mono õ nherě, ma tô te te sina 're umnhasi u'âsi za'ra, 're ãsi'utõrĩ za'ra mono zéb u.

⁴⁰ 'Re ãhâimana u'âsi mono hã ãwě uptabi hã ni-wamhã za te te wama ãsõmri za'ra na, te te sima wa'ãma roti sirõmo za'ra wa, ti'ab ré ta norĩ hã te te sima waibui õ di tô, 'Re ãhâimana u'âsi mono te te tãma ãropisutu za'ra zé hã. Uburé wasiré si te za rowě uptabi na ã'rata 're ãhâimana u'âsi za'ra mono zé hã sima waibu za'ra, ta norĩ hã.

12

'Re ãhâimana u'âsi mono hã ti'ai ãma damama ne te te 're ãda'ahã za'ra mono zé wasu'u

¹ Duréihã ni'wam norĩ hã 'Re ãhâimana u'âsi mono te te sina 're ã'umnhasi za'ra mono zéb zarina, danho'a 're ãnomro wě mono norĩ hã ahã uptabi na 'rãwi wamana wawi 're ãsimasab u'âsi mono ne, wa za ta norĩ ãma 're wasipo're pu'u u'âsi za'ra. Taha wa, wa za uburé marĩ ãwasédé hã wa te wasiwi 're wě'õ pese za'ra, 're ãwanomro wě mono zé wi, te te 're wanhowada za'ra mono tõ da, te te 're ãwawasutu u'âsi za'ra mono hã, wawasédé hã. Dawara na 're dasipibu za'ra mono wa, dahãiba wapu na 're dasisa'rei mono da, marĩ ãpire hã dahãiba na dama 're ãhâimana za'ra mono hã da te dasisa 're ãsani za'ra mono ne, wa za wawasédé

hã wa te wasiwi 're wê'õ pese za'ra. Tawamhã wanhiptete na wa za tô ãma 're wahâimana za'ra Cristuhu ãma si, tiwi 're wasipizari za'ra mono ãna. Dawara na 're dasipibu za'ra mono wamhã, dawara tete haré dasiwi 're ãdasisa'rei mono ne, wa za tô wanhiptete na ãma 're wahâimana u'âsi za'ra, Cristuhu ãma si.

² Dawara na 're dasipibu za'ra mono wa, dawara, da te 're ãrãsutu za'ra mono zéb u si, da te 're ãrob'madâ'â za'ra mono ne, wa za Zezusihi ãma si wa te wasina 're rosa'rata u'âsi za'ra. Ta hã Zezusi hã ma tô ãsãna'rata hawimhã te te 're wa'apawapto, 'Re ãhâimana u'âsi mono si wa te wasina 're umnhasi u'âsi za'ra mono da. Tane te za duré te te 're wa'apawapto u'âsi, 're ãwadâ'â za'ra mono zéb u, õhõ si wa te wasina 're umnhasi u'âsi za'ra mono da, tiwi 're wasipizari za'ra mono ãna. Ta hã Cristu hã sihâiba zawi õ di, wedepo'o ngonhi'rãmi na dazada dâ'â tõ da hã, wedepo'o ngonhi'rãmi hã dazada 're ãhâimana wasété za'ra mono norĩ pãrĩzép si nherẽ. Taha wa'rãmi, hãiwa ãma to sina 're ãhâimana u'âsi mono zé hã za tãma 're ãhâimana mono na, te te sina waihu'u sirõmo wa, taha wa, sihâiba zawi õ di tõ, wedepo'o ngonhi'rãmi na dazada dâ'â tõ da hã. ãhãna hã 'Re ãhâimana u'âsi mono nhimire niwĩ, te oto pire uptabi na 're sãmra, ãsiré 'rãwi te te 're da'ab'madâ'â u'âsi mono da oto.

³ Ma'ãpé ãma rosa'rata pese za'ra wa'aba, Zezusi hã ti'ab ré te te 're ãrobzépata mono na hã. Tiwasété si te te 're ãmanharĩ za'ra mono norĩ hã te te 're 'rui-wapari za'ra mono wa, te te tãma 're ãrob'manharĩ wasété za'ra mono zém na, ma tõ te te 're robzépata za'ëtẽ, Zezusi hã. Tane nherẽ, siptete u'âsi ma

tô 're hâimana. Tane duré a norĩ wa'wa hã te za marĩ ãwasété wi 're asi'madâ'â pese za'ra wa'aba mo, asiptete sina 're aihâimana za'ra wa'aba mono da, aiwi 're robzei'õ za'ra wa'aba mono tõ da. Taha zarina, 'Re ãhâimana u'âsi mono hã asina 're ã'umhãsi za'ra wa'aba mono zé hã aiwi 're si'utõrĩ za'ra wa'aba mono tõ da, te za tô asiptete sina 're aihâimana za'ra wa'aba mo.

⁴ Dawasété nhiptete da, asiptete sina 're aihâimana za'ra wa'aba mono nherẽ, zahadu ai'matâ'â aba õ di, da te aima ã'mairob'manharĩ za'ëtê aba na hã, Zezusi ãdâ'â ne hã.

⁵ E ma tô bété ãma aipo're si'ãri za'ra wa'wa, 'Re ãhâimana u'âsi mono hã te te aima ãroti za'ra wa'aba zém na hã, duré ti'ra na te te aima ãnharĩ za'ra wa'aba zém na hã. ãne ma tô ãhã wasu'u na ni'wa hã ãma rob'ui'ére, duréihã:

“A norĩ wa'wa hã ã'ra na ãma 're aihâimana za'ra wa'aba mono nherẽ, aiwasédé hã 're ã'manharĩ za'ra wa'aba mono zém na 're asisãmri za'ra wa'aba mono da, wa hã Danhib'apito uptabi hã te 're aihã za'ra wa'aba mono wamhã, ã'ãma 're rosa'rata upa za'ra wa'aba mono õ di za, taré newa.

Duré apã 're anomro wê wa'aba mono da, niha te aima 're rob'manharĩ za'ra wa'aba mono wamhã, aiwi 're robzei'õ za'ra wa'aba mono õ di za. Te za ã'ãma asima 're ãrosa'rata wê u'âsi za'ra wa'aba mo.

⁶ E marĩ wa, aiwi 're robzei'õ za'ra wa'aba mono õ di za. Wa hã Danhib'apito uptabi hã uburé te 're ã'azawi pese mono norĩ hã te 're ahã za'ra mono wa. Duré tiwasété na 'rãwi 're sisãmri za'ra mono da, uburé ã'ra na te 're ãsisi za'ra mono norĩ hã apã 're

nomro wě mono da, wa wa hã te tãma 're arob'manharĩ, ta norĩ ma hã."

Ñe wa, aiwi 're robzei'õ za'ra wa'aba mono õ di za, 'Re ãhãimana u'ãsi mono te te 're aihã za'ra wa'aba mono wamhã.

⁷ Damama norĩ hã bété. E ti'ra norĩ hã te te 're hã za'ra mono õ di za, po're ãna 're hãimana za'ra mono wamhã. Te za tô te te 're hã za'ra. Tane te duré Aimama 'wa hã 'Re ãhãimana u'ãsi mono hã te te 're aihã za'ra wa'wa. E marĩ wa. Ì'ra si tãma 're aihãimana za'ra wa'aba mono wa oto. Taha wa, marĩ na 're robzépata za'ra wa'aba mono nherẽ, te za sada 're asiptete za'ra wa'aba mo, aiwi 're robzei'õ za'ra wa'aba mono ãna. 'Re ãhãimana u'ãsi mono 'ra si, oto tãma 're aihãimana za'ra wa'aba mono wa, te te 're ã'aihã za'ra wa'aba mono zém na asina 're waihu'u pese za'ra wa'aba mono wa, te za sada 're asiptete za'ra wa'aba mo.

⁸ Uburé te tô ti'ra norĩ hã te te 're ahã za'ra 'Re ãhãimana u'ãsi mono hã, tiwasédé hã te te 're ã'manharĩ za'ra mono zém na ãma 're siwaihu'u za'ra mono da oto, ta norĩ hã. Taha wa, te te 're ai'mai'ahãri aba mono õ wamhã, ã'ra'õ na te za 'rãwi 're ai'masiwaihu'u aba mo. Ñe wamhã, ni'wa hã mama õ wa, da te 're ã'ahãri mono õ ne, 're ai'maihãimana aba mono na te za 'rãwi 're ai'masiwaihu'u aba mo, sena na ã'ra na tãma 're ai'maihãimana aba mono õ na hã.

⁹ Ti'ai ãma wamama uptabi norĩ hã wawasété na 'rãwi 're wasiwaihu'u za'ra mono da, wanhimiza'rese wi te te 're wahã za'ra mono wamhã, wa tô ta norĩ hã wa te 're hãimana wazéb za'ra, wama pire na 're hãimana za'ra mono wa. Taha nhipai u, wa za duré hãiwa ãma Wamama uptabi hã wa te 're wapari pese za'ra, te te 're wa'ahã za'ra

mono nherẽ, rowẽ na õhõ ãma si 're wanomro u'âsi mono da oto.

¹⁰ Ti'ai ãma wamama uptabi norĩ hã ma tô wanhimiza'rese wi te te 're wa'ahâ za'ra tô, 're waprédub za'ra mono õ ré hã. Wawasété na 'râwi 're wasiwaihu'u za'ra mono da, ma tô te te 're wa'ahâ za'ra, niwamhã ï'uwaibaba uptabi õ nherẽ, damama norĩ nhimi'ahârizé hã. Tazahã, 'Re ïhâimana u'âsi mono si, te ï'uwaibaba si te te 're wa'ahâ za'ra. Te te 're ïwa'apawapto mono da si, te za tô ti'ai ãma 're wanomro mono ré, te te 're wa'ahâ za'ra, wawasété ãna ïsine 're wahâimana za'ra mono da oto, wa norĩ hã.

¹¹ Wawasédé hã wa te 're ï'manharĩ za'ra mono zém na 'râwi 're wasiwaihu'u za'ra mono da, 'Re ïhâimana u'âsi mono te te 're wahâ za'ra mono wamhã, awa'awi 're watoj waihu'u za'ra mono õ di, taha na hã. Robzei'õ na si wa za a'â 're wahâimana za'ra. Tane nherẽ, 'Re ïhâimana u'âsi mono te te 're ïwahâ za'ra mono zém na oto 'râwi 're wasiwaihu'u za'ra mono wamhã, duré wa'ãma 're ronomro pese za'ra mono wapsi, te za wapẽ hã ï're wama 're simi'wara wẽ oto, õhõ ãma si 're ïwanomro wẽ mono zéb zarina wa.

'Re ïhâimana u'âsi mono mreime, da te 're ïwapari pese za'ra mono zé wasu'u

¹² Taha wa, marĩ na 're robzépata za'ra wa'aba mono wamhã, aipẽ'ẽ wẽ zarina te za asiptete sina ãma 're aihâimana za'ra wa'aba mo, 'Re ïhâimana u'âsi mono ãma si, aiwi 're robzei'õ pese za'ra wa'aba mono wa, tiwi asina 're aipahâ za'ra wa'aba mono tõ da.

¹³ Bâdâdi na awa'awi u'âsi 're ïdanomro mono ne, te za Cristuhu nhirã zarina si awa'awi 're

anomro u'âsi aba mo, ïwê na si. ãne wamhã, ï'rãtêire hã morĩ wasété na 're ïmorĩ ne, ni'wam norĩ hã Cristuhu ãma sib'uware na 're ïhâimana za'ra mono norĩ hã asine wa'aba, awa'awi u'âsi 're nomro wê mono wamhã, ta norĩ hã tiwasété na 're si'marõpãrĩ zahu za'ra mono õ di za oto. Apã te za ai'ãma 're siptete za'ra wa'wa, ïsazei uptabi 'wa na 're ïaihâimana za'ra wa'aba mono zém na hã.

¹⁴ Rowê zô te za 're asõpré wa'aba mo, dasiré 're aihâimana za'ra wa'aba mono da. Duré 'Re ïhâimana u'âsi mono ma si 're asisõmri u'âsi za'ra wa'aba mono da, te za 're asi'madã'ã pese za'ra wa'aba mo. ãne hã ni'wam norĩ hã 're hâimana wê za'ra mono õ nherê, niwamhã Wanhíb'apito hã titõmo na te te dame 'madã'ã za'ra õ di za, ta norĩ hã.

¹⁵ 'Re aihâimana za'ra wa'aba mono zém na, 'Re ïhâimana u'âsi mono ma, asina ãma 're uwaimrami za'ra wa'aba mono õ wa, tinhoprubzéb zarina, ïwê uptabi hã te te aima 're ïpisutu za'ra wa'aba mono hã 're simini za'ra wa'aba mono tõ da, te za 're asi'madã'ã pese za'ra wa'aba mo. Wede pa hã, ti'ai 'rowi 're simi'wara mono ré hã, taha wa'uzé hã dama simimnhasi õ di. Tane nherê, ïpa hã da te oto 're sa'o'o za'ra mono wa, da te oto 're huri mono wamhã, te za te te 're da'rãiwamnarĩ za'ra, taha pa wa'u hã sé wa. Tane duré, a norĩ wa'wa hã te za ni'wam norĩ wi 're asi'madã'ã pese za'ra wa'aba mo, ta norĩ hã te te aiwi 're rowasété za'ra wa'aba mono tõ da, duré taha zarina a norĩ wa'wa hã 'rãwi aiwasété na 're asi'uptob za'ra wa'aba mono tõ da, ta norĩ zu.

¹⁶ Duréihã Eza'u hã tãma mrab uptabi wa, ma tô tino nhipi hã tiwi waptê, Zacohe wi. Tawamhã ïmama ma ïpoto'rata zarina, uburé marĩ hã ïmama te

te tãma ĩpisudu hã, duré 'Re ĩhãimana u'ãsi mono, ĩwẽ hã te te tãma ĩpisudu hã ĩ'upana ĩnoi ma 're hãimana mono da, ma tã tinoi ma ti'ru, ĩsipi wa'rãmi Eza'u hã, taha na sai õ ré. ãne hã Eza'u hã 're ĩhãimana wasété mono ne, te duré ni'wam norĩ hã asiré 're hãimana wasété za'ra wa'wa. Ta norĩ wi, te za 're asi'madã'ã pese za'ra wa'aba mo, sina 're ĩsipsaihuri za'ra mono norĩ wi, 'Re ĩhãimana u'ãsi mono hãimanazé te te 're ĩwazéb za'ra mono õ norĩ wi hã.

¹⁷ Tawamhã taha na ãma ronomro parip si, ma tã Eza'u hã timama ma tinha, 'Re ĩhãimana u'ãsi mono ma, ãma mreme da, ĩwẽ hã te te tãma 're anhomri mono da, ĩnoi upana. Tane nherẽ, ma tã ĩmama hã siwi wẽ'õ, ãma mreme tã da. Taha wa, tiwasédé te te 'manharĩ pari nherẽ, apã te te sima pari waihu'u õ di, timama ma te te nharĩ sina, wawa 'rãihã na wawa nherẽ. ãhã wasu'u hã aima waihu'u pese za'ra wa'aba di, ãne na hã.

¹⁸ Duréhã Izarazéhé nhihudu norĩ hã ma tã Sina'i na êtẽ 'rãihã nhisi u sina rotété za'ra, tame ĩ'rata si'ubumro da a'ã, 'Re ĩhãimana u'ãsi mono 'rata. Ta hã êtẽ 'rãihã hã danhib'rata na da te upi waihu'u pese di. Tane nherẽ, a norĩ wa'wa hã tane 're aihãimana za'ra wa'aba mono õ di oto, ãhãna hã. 'Re ĩhãimana u'ãsi mono u, aipẽ'ẽ na 'rãwi ĩtẽme 're aihutu aba mono wamhã, marĩ hã asib'rata na 're upi waihu'u za'ra wa'aba mono õ di za. Izarazéhé nhihudu norĩ si ma tã 'rãwi unhamã ro'o za'ẽne hã 'madã'ã za'ra, êtẽ 'rãihã nhisiwimhã. Tamemhã ma duré hãiwa nhirõtõ 'rãdã hã watobro, ĩ'rãdã'ãra uptabi hã. Rowa'u'u za'êtẽ zama ma tã duré watobro, êtẽ 'rãihã nhisi ãma hã. ãne ma tã ta norĩ hã 'madã'ã za'ra titõmo na, Izarazéhé nhihudu norĩ hã.

19 Danhimnhihârâzé hã ãhârâ 'rãihã hã ma tô duré wapari za'ra. 'Re ãhãmãna u'ãsi mono mreme zama ma tô duré wapari za'ra, Izarazéhé nhihudu norĩ hã. Ta hã te te wapari za'ra wamhã, 'Re ãhãmãna u'ãsi mono hã niha te tãma rob'manharĩ za'ra õ'umnhasite, ma tô sima wẽ za'ra, Mozésihi ma si te te rowaihu'u mono da, 'Re ãhãmãna u'ãsi mono hã, hãiba pisutu.

20 E marĩ wa, ma tô ta norĩ hã 'Re ãhãmãna u'ãsi mono ma tipahi za'ra, Izarazéhé nhihudu norĩ hã. 'Re ãhãmãna u'ãsi mono hã ma tô êtẽ 'rãihã hãiba na tãma roti za'ra, ãne: “Ni'wa hã ã êtẽ 'rãihã hã te te upi wamhã, te za asiwi ãwĩrĩ 'wa, êtẽ na. Asimizama aba zama, te te sina 'mai'upi wamhã, te za ãwĩrĩ 'wa, êtẽ na.” ãne ma tô êtẽ 'rãihã hãiba na ta norĩ ma mreme pire na tãma roti za'ra aré, 'Re ãhãmãna u'ãsi mono hã. Taha pipa te, ma tô Izarazéhé nhihudu norĩ hã sima wẽ za'ra, Mozésihi ma si, hãiba pisutu te te rowaihu'u mono da, 'Re ãhãmãna u'ãsi mono hã, taha ma si.

21 ã hã te te ã'madã'ã za'ra hã pipa uptabi wa, te Mozési hã 'rãwi sima tinha, ãne: “ãpahi wa, wa tãma rẽrẽ.” ãne te sima tinha, Mozési hã. ãne ma tô ropipa uptabi hã êtẽ 'rãihã ãma ãsõ'a ãwatobro za'ra hã 'madã'ã za'ra duréihã, Izarazéhé nhihudu norĩ hã, 'Re ãhãmãna u'ãsi mono u te te sina rotété za'ra wamhã.

22 Tazahã, a norĩ wa'wa hã tane 're aihãmãna za'ra wa'aba mono õ di oto, ãhãna hã. 'Re ãhãmãna u'ãsi mono u aipẽ'ẽ na 'rãwi 're rob'umhutu za'ra wa'aba mono wamhã, hãiba ãma Si'ã na êtẽ 'rãihã nhisi u ne, ma tô 're ãrob'umhutu za'ra wa'aba mo. Duré hãiba ãma Zeruzarẽ hã 'ri nho'õmo u ne, ma tô 're ãrob'umhutu za'ra wa'aba mo, 'Re ãhãmãna

u'âsi mono 're ãsãmra u'âsi mono zéb u hã, hãiwa ãma tãma ãromhuri'wa norĩ hã ahã uptabi na, ã'rata 're ãsi'ubumroi mono zéb u zama.

²³ Tame te oto 'Re ãhãimana u'âsi mono nhib'a'uwẽ norĩ hã to sina 're si'rã'õtõ, aibã hã dama 're poto 'rata za'ra mono wa, dama ãsawi pese ne, 'Re ãhãimana u'âsi mono te te 're ã'azawi pese mono norĩ hã, hãiwa ãma sisi ui'ére ré 're ãhãimana za'ra mono norĩ hã. Tamomo ma tõ ãtẽme 're ãrob'umhutu za'ra wa'aba mo, dahãimanazẽm na ã'uwaibaba si te te 're ãda'awaihu'u mono zéb zarina, dama rowairébé'wai u hã. Duré ti'ai ãma ré ãwẽ si te te 're ã'manharĩ za'ra mono norĩ hã 're ãhãimana za'ra mono zéb u, ma tõ duré 're ãrob'umhutu za'ra wa'aba mo, 'Re ãhãimana u'âsi mono te te tãma 're ãwẽ za'ra mono zéb zarina si, rowẽ uptabi na oto 're ãhãimana za'ra mono norĩ u hã.

²⁴ Zezusihi u ma tõ duré 're ãrob'umhutu za'ra wa'aba mo. Ta hã te oto 'Re ãhãimana u'âsi mono te te dama ãropisutuzép té hã te te wa'ãma 're ab'madã'ã u'âsi. Duréihã Ca'ĩ hã tino te te wĩrĩ wa, ãwapru hã tiwi pu'u wamhã, 'Re ãhãimana u'âsi mono te te ã'ruiwa'ãbãzé, te wasu'u, Abéhé wapru hã. Tanei õ di, Zezusihi wapru hã. Dazada dã'ã wa, ãwapru hã tiwi pu'u wamhã, 'Re ãhãimana u'âsi mono hã dawasédé te te dama 're ã'apari mono zé, te wasu'u, Zezusihi wapru hã.

²⁵ Taha wa, te za 're asi'madã'ã pese za'ra wa'aba mo, 'Re ãhãimana u'âsi mono hã te te aima 're rowasu'u za'ra wa'aba mono wamhã, tiwi 're asipo're nhitob za'ra wa'aba mono tõ da. Duréihã Sina'ĩ na ãtẽ 'rãihã nhisi ãma, 'Re ãhãimana u'âsi mono hã ti'ai u te te we dama rowasu'u wamhã, ãsimiroti wapari'õ'wa norĩ hã wairébé õ di, te te ãdahã za'ra zé wi hã. Wa norĩ hã bété. E 'Re

ĩhâimana u'âsi mono hã hãiwa hawi te te wei wama 're aroti wẽ mono nherẽ, tiwi 're wasipizari za'ra mono wamhã, e ĩsimihâzé wi wasi'uihã na 're wawairébé mono da bâ, wa za wanhimipari ãna 're wanomro u'âsi bété.

²⁶ Duréhã 'Re ĩhâimana u'âsi mono hã Sina'i na êtẽ 'rãihã nhisi ãma te te dama roti wamhã, ma tô ti'a hã sãsã'ã. Tane nherẽ, taha za'u hã ma tô oto dama ropisutu, ãne: “Ti'a hã niwapsi wa za duré sãsã'ã, ĩrẽme ma. Tawamhã, ti'a si te sãsã'ã õ di za oto. Hãiwa nhirõtõ zama, wa za ĩsu sãsã'ã, nimahã na hã.” ãne 'Re ĩhâimana u'âsi mono te te dama ĩropisutuzép tém na rob'ui'ééré hã.

²⁷ E marĩ te tawamhã wama wasu'u za'ra ĩmreme hã, “ĩrẽme ma” na hã. Uburé marĩ hã ti'ai ãma, 'Re ĩhâimana u'âsi mono nhimipodo hã nimahã na te te sãsã'ã za'ra wa, za ĩsi'utõrĩ mono zé, te wama wasu'u za'ra. Tawamhã taha nhowa're're, te za ĩwẽ uptabi hã da te oto ĩsãsã'ã waihu'u'õ hã 're hãimana u'âsi za'ra hãiwa ãma, ĩsi'utõrĩ waihu'u'õ hã.

²⁸ 'Re ĩhâimana u'âsi mono hã 'rãwi te te 're wa'ab'madâ'â mono da, ĩ'rata 're ĩwahâimana u'âsi za'ra mono zéb da hã, ma tô te te wama 're apisutu, da te wawi ãma ĩ'ai'uté waihu'u za'ra õ hã. Taha wa, wa za 'Re ĩhâimana u'âsi mono ãma 're wawata u'âsi za'ra, sõpru wa. Te te sima 're ĩwa'awẽ mono zéb zarina, wa za ãma 're wawata u'âsi za'ra, wa te wasiwi 're wazéb za'ra mono sina, wama 're toi u'âsi mono da.

²⁹ 'Re ĩhâimana u'âsi mono hã Wanhib'apito za'ra hã ĩpo're'õ norĩ hã te te uprosi waihu'u pese di, unhama ro'o za'êtẽ na marĩ hã 're ĩsi'unhama pese mono ne hã. Taha wa, wa za tô wa norĩ hã ĩmreme hã wa te 're wapari u'âsi za'ra, Wanhib'apito

nhimiroti hã.

13

'Re ãhãmãna u'ãsi mono hã dama 're ãtoi mono zé wasu'u

¹ Cristuhu ãma si oto 're asisãnawã za'ra wa'aba mono wa, te za a norĩ wa'wa hã õne u'ãsi 're asisawi pese za'ra wa'aba mo oto.

² Darob amoi hawi atẽme 're dasihutu za'ra wa'aba mono wamhã, asõrõwa u, te za duré 're ãda'mazasi wẽ za'ra wa'aba mo. Ni'wam norĩ hã tinhorõwa u te te 're da'mazasi wẽ za'ra mono wamhã, hãiwa ãma 'Re ãhãmãna u'ãsi mono ma romhuri'wa norĩ hã ma tõ te te 're 'mazasi wẽ za'ra, tãma sa'rese za'ra õ nherẽ, hãiwa ãma romhuri'wa norĩ hã.

³ Duré wasiré ãsazei'wa norĩ ãma te za 're aipo're pu'u u'ãsi za'ra wa'aba mo, dazazéb 're, 're ãsimasa mono norĩ ãma hã, ta norĩ hã asiwi 're pawaptob za'ra wa'aba mono da. Dazazéb 're, ta norĩ siré 're aimasa wa'aba mono ne, te za ãma 're aipo're pu'u u'ãsi za'ra wa'aba mo. Duré marĩ na te te 're ãrobzépata za'ra mono norĩ ãma zama, te za duré 're aipo're pu'u u'ãsi za'ra wa'aba mo, ta norĩ siré 're ãrobzépata za'ra wa'aba mono ne.

⁴ Damro ré norĩ hãimanazé hã te za 're ãwazé pese za'ra wa'aba mo, 'Re ãhãmãna u'ãsi mono ma, pire uptabi wa. Aimro si te za asima 're ãmadã'ã u'ãsi za'ra wa'aba mo. E marĩ wa. Ni'wam norĩ hã tihãiba na tiwasédé hã te te 're 'manharĩ za'ra mono wamhã, 'Re ãhãmãna u'ãsi mono hã te za ta norĩ hã te te 're hã za'ra. Duré ni'wam norĩ hã mro ré nherẽ, ãmro'õ na 're sipsaihuri za'ra mono wamhã, te za ta norĩ hã duré te te 're hã za'ra, 'Re ãhãmãna u'ãsi mono hã.

⁵ Rob'uiprazép si, asima 're sawi za'ra wa'aba mono õ di za. Asibro hã aima 're ãhâimana za'ra wa'aba mono nhipai u, marĩ zô 're rob'ruiwapari zahu za'ra wa'aba mono õ di za. Duréihã 'Re ãhâimana u'âsi mono hã ma tô ãne dama sina ropisutu: “Niwamhã asiti za'ra wa'aba 're ãhâimana mono õ di za. Duré te airẽme waihu'u za'ra wa'aba õ di za.” ãne te te dama sina ãropisutuzém na rob'ui'éré hã, ãbaihã na hã.

⁶ Taha wa, 'Re ãhâimana u'âsi mono hã wa te wasina 're ã'umnhasi za'ra mono zéb zarina, wa za ãne wa te wasima 're nharĩ za'ra, duréihã apito Dawi hã te te sima ãnharĩ ne, ãne:

“Danhib'apito uptabi hã te te 're ãpawaptob u'âsi.

Taha wa, ãsina 're ãpahi mono õ di, wa hã.

ãne wamhã, e niha da te ãma rob'manharĩ da bâ.”

ãne duréihã Dawi hã 'rãwi te te sima ãnharĩ ne, wa za duré wa norĩ hã wa te wasima 're nharĩ za'ra, ãsine.

⁷ Ma'ãpé ãma asipo're pu'u za'ra wa'aba, 'Re ãhâimana u'âsi mono zadawa wasu'u na ãsãna'rata hawi te te ãma aima 're ãrowasu'u za'ra wa'aba mono norĩ ãma hã, ai'madá'ã'wa za'ra wa'aba norĩ ãma hã. Ta norĩ 're ãhâimana za'ra mono zém na, duré 're ãdã'ã za'ra mono zém na zama, te za ãma 're asipo're pu'u u'âsi za'ra wa'aba mo. Ta norĩ hã 'Re ãhâimana u'âsi mono si te te sina 're ã'umnhasi za'ra mono ne, te za duré a norĩ wa'wa hã ãsine asina 're ã'umnhasi za'ra wa'aba mo, 'Re ãhâimana u'âsi mono hã.

⁸ Zezu Cristu hã tihãimanazém na hã te te ãma 're saprĩ waihu'u mono õ di. Õne u'âsi te tô misi haré ãma 're hãimana u'âsi, bãtã sidãpãsi.

⁹ Cristuhu wasu'uwẽ upana, danhimiroti aimawi na da'ãma 're sasõmri za'ra wa'aba mono

õ di za, senai'õ na da te dasima 're ãrowasu'u za'ra mono na hã. 'Re ãhãimana u'ãsi mono hã tinhoprubzéb zarina, ãwẽ uptabi hã te te wama 're ã'apisutu mono na si, wa za wapẽ'ẽ 're ãma 're wanhiptete za'ra. Taha si wa norĩ hã wama ãwẽ uptabi za'ra hã. Dasa hã da te dasiwi 're ãsawi za'ra mono na roti hã da te 're ã'madã'ã za'ra mono na, ãma 're danhiptete waihu'u za'ra mono õ di, dapẽ'ẽ 'remhã. Mare di. E marĩ wa. Taré wa, dasa hã. Taha na ãma 're dasipawapto waihu'u za'ra mono õ di tô, dasa da te dasiwi 're ãsawi za'ra mono na roti na hã.

¹⁰ Duréihã 'Re ãhãimana u'ãsi mono ma, da'ãma romhuri'wa norĩ hã, sasedoti norĩ hã dawasété parizéb da, danhimizama te te tãma 're simroi mono wamhã, ta norĩ hã ãnhi na hã 're saihuri waihu'u mono õ di. Tane duré, ni'wam norĩ hã danhimizama wapru na 'Re ãhãimana u'ãsi mono hã dawasédé hã zahadu te te dama ãma 're apari mono newa, te za Cristu hã sada ãdã'ã za'ra zé hã ta norĩ hã te te 're simini za'ra. Wa norĩ si Cristuhu zazei'wa norĩ si, wa za wa te wasina ãma 're uwaimrami za'ra, wazada ãdã'ã za'ra zém na hã.

¹¹ Sasedoti norĩ nhib'apito, tisiré norĩ ma ãpire uptabi si wahub sidãpãsi ma tô danhimizama wapru rí ãtẽme 're sisisi, 'ri 're wa'wa u, 'Re ãhãimana u'ãsi mono, ãwa 're ãsãmra mono zéb u hã. Dawasété parizéb da, ma tô ta norĩ hã tãma ãma 're sõprub za'ra, 'Re ãhãimana u'ãsi mono ma. Tane nherẽ, ma tô romhã na danhimizama hãiba hã da te 're zata pese za'ra, danhimizahãri sidãpãsi 'ri hã da te dasima 're ãsõré za'ra mono zém nhiti.

¹² ãne wa, ma tô duré Zezusi hã 'ri 'wawi wa'razém nhiti dãrã, te te ãrobzépata za'ëtẽ zarina,

tiwapru na taha si te te oto 're da'a'upsõi mono da, dawasété hawi.

¹³ Taha wa, wa za oto wa norĩ hã Zezusihi u si dawi 're wawairébé, taha si tô sena te te 're wa'anho'reptui mono da. Taha wa, wa za tô, 're ĩdanomro 'rata mono zé hã, wa te 're rēme pese za'ra. Zezusi hã wazada dâ'â wa, da te dasiwi ĩruiwapari ne, da te 're wa'ruiwapari za'ra mono da nherē, wa za tô ĩtēme 're wawairébé, 're ĩwanomro 'rata mono zém hawi, Zezusihi u hã.

¹⁴ Āme ti'ai āma 'ri nho'u hã 're ĩ'maihâimana u'âsi mono hã wama 're 'maihâimana mono õ di, āma 're ĩwahâimana u'âsi za'ra mono zéb da hã. Robaba uptabi di. Hâiwa āma 'ri nho'õmo zô si, wa za wasima 're wanhopré u'âsi, za tame wama 're ĩhâimana u'âsi za'ra mono zô si.

¹⁵ Taha wa, Zezusi hã wazada ĩdâ'âzéb zarina, wa za 'Re ĩhâimana u'âsi mono āma 're wawata u'âsi za'ra, taha si wama 're toi u'âsi za'ra mono da. Duréihã danhimizama na duré dasa na 'Re ĩhâimana u'âsi mono ma, 're danhoprub za'ra mono wa, dama 're ĩtoi mono ne, wa za āma 're wawata u'âsi za'ra, wama 're toi u'âsi mono da. 'Re ĩhâimana u'âsi mono hã wa te wasina 're ĩ'umnhasi za'ra mono zém na sõ'awi dama 're ĩwasiwasu'u za'ra mono na zama, wa za tãma āma 're wanhoprub za'ra, 'Re ĩhâimana u'âsi mono ma hã.

¹⁶ Marĩ ĩwē hã 're 'manharĩ za'ra wa'aba mono da dama, duré 're ĩdapawaptob za'ra wa'aba mono zém na hã, āma 're aipo're simrami za'ra wa'aba mono õ di za. Taha na zama te duré tãma 're asõprub za'ra wa'aba mo, taha na aima 're toi u'âsi za'ra wa'aba mono wa, 'Re ĩhâimana u'âsi mono hã.

¹⁷ Asiré ĩsazei'wa 'madâ'â'wa norĩ nhimiroti hã te za 're ĩwapari pese za'ra wa'aba mo. Te te aima 're

ĩroti za'ra wa'aba mono zéb zarina, te za marĩ hã 're ĩ'manharĩ za'ra wa'aba mo. Ta norĩ hã niwapsi te za 'Re ĩhâimana u'âsi mono ma siwasu'u za'ra, te te ai'ãma 're ĩromhuri za'ra wa'aba mono zém na hã. Taha wa, te ta norĩ hã ai'ãma 're hâtâ'â u'âsi za'ra wa'wa, te te 're ĩ'ai'madâ'â za'ra wa'aba mono zém na hã, Cristuhu zazei'wa 're ĩhâimana za'ra mono zém na si 're anomro aba mono da. Ta norĩ nhimiroti hã 're wapari pese za'ra wa'aba mono wamhã, to sina te za tô ta norĩ hã te te ai'ãma 're romhuri za'ra wa'wa. Tane nherẽ, 're wapari za'ra wa'aba mono õ wamhã, robzei ãna te za te te 're romhuri za'ra. ãne wamhã, te te 're aipawapto waihu'u za'ra wa'aba mono õ di za, ta norĩ hã.

¹⁸ Ma'ãpé, wa'ãma 're aimreme zusi u'âsi aba mono za, 'Re ĩhâimana u'âsi mono ma. 'Re ĩwanomro wẽ mono da si, wa tô wa norĩ hã wa te wasima 're wẽ u'âsi za'ra. Taha wa, marĩ na 're ĩwahâimana wasété za'ra mono zém na hã 'râwi wapẽ'ẽ na 're wasisãmri za'ra mono õ di oto, wama 're hâimana za'ra mono õ wa.

¹⁹ Taha wa, wa duré wa hã ĩsima aiwẽ uptabi za'ra wa'wa, ĩ'ãma zama 're aimreme zusi aba mono da, 'Re ĩhâimana u'âsi mono hã te te ãma ĩzatõrĩ su'u da, atẽme za'ra wa'aba, te asabu za'ra wa'aba hã.

²⁰⁻²¹ Wanhib'apito Zezusi hã wazada ĩdâ'âzéb zarina, te oto pone'ërebâ 'madâ'â'wa ne, wama 're hâimana za'ra, wa'madâ'â'wa ĩwẽ uptabi na hã. Wazada ĩdâ'âzéb zarina, ma tô 'Re ĩhâimana u'âsi mono hã taha na dama ropisutu té, ãma 're dahâimana u'âsi za'ra mono da oto, taha ãma si. Zezusi hã dâ'â nherẽ, ma tô ĩmama hã apâ hâiwa'utu.

'Re ĩhâimana u'âsi mono hã dama rowẽ pisutu'wa hã, ĩwẽ si te te aima 're sômri za'ra wa'aba mono da, wa taha na si te ai'ãma 're umnhasi za'ra wa'wa, taha zarina uburé marĩ hã te te aima 're ĩwẽ za'ra wa'aba mono zéb zarina si, tãma ãma asina 're uwaimrami za'ra wa'aba mono da. Duré Zezu Cristuhu waihu'u pese na te te 're wa'apawapto mono da, wa duré taha na si te ai'ãma 're umnhasi za'ra wa'wa, ĩwẽ si wa te oto tãma 're 'manharĩ za'ra mono wa, wa'ãma 're toi u'âsi mono da, 'Re ĩhâimana u'âsi mono hã.

Taha wa, Zezu Cristuhu ãma si ãma 're wawata u'âsi za'ra wa'aba mono za. Tane tô.

Rowasu'u 'rãsutuzé wasu'u

²² ĩsisãnawã norĩ, ã te aima ãma ĩroti za'ra wa'aba zém na, ma'ãpé aiwaimri ãma rosa'rata pese za'ra wa'aba za. Taha da, wa tô ĩmreme 'rutu na ãma aima rowasu'u za'ra wa'wa, ã ĩnhimi'ui'éré na hã.

²³ Wasisãnawã Timotiu hã ma tô dazazém hawi watobro, da te tãma ĩrob'ruzéb zarina. Áne hã waihu'u za'ra wa'aba da, wa tô ĩsima aiwẽ za'ra wa'wa. Tawamhã, ta hã we ĩtême wisi su'u wamhã, ãme ĩnhamra ré, te te ĩnhiza wamhã, te za ãma ĩsiré mo, atême za'ra wa'aba, taha zama te te duré asabu za'ra wa'aba da, ĩsiré.

²⁴ Ma'ãpé uburé ai'madâ'â za'ra wa'aba 'wa norĩ hã wama sawi za'ra wa'aba za. Uburé 'Re ĩhâimana u'âsi mono nhib'a'uwẽ, tame 're ĩhâimana za'ra mono norĩ zama, wama sawi za'ra wa'aba za duré.

Itaria na danhipti'a nho'õmo nhisi hawi 're ĩwairébé mono norĩ zama te ãma asawi za'ra wa'wa duré, ĩsazei'wa norĩ, siré 're ĩsi'ubumroi mono norĩ hã.

25 'Re ãhâimana u'âsi mono ma, wa ai'ãma 're ãmreme u'âsi za'ra wa'wa, ãsimizawizé hã aima 're hãimana u'âsi za'ra wa'aba mono da.

'Re ãhãimana u'ãsi mono zadawa wasu'u
New Testament in Xavãnte (BR:xav:Xavãnte)

copyright © 2004 Wycliffe Bible Translators, Inc.

Language: Xavãnte

Translation by: Wycliffe Bible Translators, Inc.

Xavãnte [xav], Brazil

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 1882536746

The New Testament

in Xavãnte

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

744f0b3a-210f-53c7-b3a1-39b62617ba0c